

清史列傳

冊罕



29-5511

清史列傳 卷四十一

大臣傳續編六

杜受田

杜受田山東濱州人父塈禮部左侍郎贈太傅大學士受田月大考二等以中允林院庶吉士六年散館授編修八年充順天鄉試同考官十一年充國史館提調十二年充雲南鄉試副考官十三年七月大考二等以中允陞用先換頂戴八月提督陝甘學政以陝西巡撫史譜係兒女姻親奏請迴避調山西學政十四年二月補右春坊右中允五月轉左春坊左中允十五年七月陞司經局洗馬八月召回京供職十六年正月命在上書房行走授文宗顯皇帝讀四月充日講起居注官十七年二月京察一等尋擢右春坊右庶子十二月陞翰林院侍講學士十八年四月轉侍讀學士七月陞內閣學士兼禮部侍郎銜命專心授讀毋庸到閣批本十二月擢工部左侍郎十九年兼署錢法堂事務二十年充朝考閱卷官二十一年三月充會試副考官閏三月調戶部左侍郎兼管三庫事務二十二年六月

因英人犯順受田以廣東生員張煥元防夷書內木簿火攻之議繕錄陳奏命下江蘇安徽各督撫相機速辦十二月充經筵講官時國史館纂大清一統志告成受田以曾充提調下部議敘二十三年五月議覆署漕運總督李湘棻奏籌漕務章程疏言查山東十字河大泛口及直隸楊村一帶既據各督撫查明該處上游建築束水滾水等壩於事無益惟有順地形之高下察河道之淺淤或隨時用人夫搶撈或逐閘用嚴板託送或築束水壩於衛河以疏淺或用刮板於北運河以除淤均責成沿河該管州縣認真辦理以利漕運應如所議辦理允之六月以顏料庫不戒於火罰俸半年二十四年二月陞都察院左都御史仍管理戶部三庫事務八月充順天鄉試正考官十一月賜紫禁城騎馬十二月陞工部尙書二十六年九月受田六十生辰御書福壽字並諸珍物賜之十二月以御門誤班奪俸二年二十七年三月充會試副考官二十九年充上書房總師傅三十年正月文宗顯皇帝御極諭曰朕自六歲入學讀書仰蒙皇考特諭杜受田爲朕講習討論十餘年來啟迪多方恪勤罔懈受益良多允宜特沛殊恩以崇碩學杜受田著賞加太子太傅銜伊父前任禮部侍郎杜堦年逾八旬精神強固詒謀遠大濟美中

朝前經皇考賞給教忠篤慶扁額並賞頭品頂帶太子太保銜朕今復親書扁額頒給以示篤念耆臣推恩錫類至意二月充實錄館總裁三月兼署吏部尙書五月應文宗顯皇帝登極求賢詔疏薦前任雲貴總督林則徐前任漕運總督周天爵得旨迅速來京聽候簡用旋充教習庶吉士調刑部尙書六月命以刑部尙書協辦大學士七月扈蹕恭送宣宗成皇帝梓宮奉移慕陵禮成加二級八月命專司勘辦實錄彙本十月諭曰實錄館纂辦彙本漸次成書杜受田專司勘辦著毋庸赴刑部辦事時黃河入海之處塌陷數百丈受田奏請敕令江南河臣乘冬令水小就其塌陷之處多築草壩逼溜攻刷可期事半功倍如所請行咸豐元年正月上恭謁慕陵命留京辦事尋諭曰朕在書房經協辦大學士杜受田昕夕講求詩文積有彙本其中可存之作卽交杜受田重爲校勘編次進呈俟閱定後再行發交繕刻先是道光二十二年給事中李蕓奏請准增生報捐復設訓導經部議行至是受田疏言復設訓導與教授學正教諭階級雖殊其爲士子之師則一向例祇准廩生報捐至增生附生與廩生原有區別學臣歲科兩試大率文理最優者擢得前列次則多屬中平其三等則荒疏讓陋者居多若一概准捐教職則是

文理中平甚至疏陋者力能援例皆得抗顏爲師恐墮士子讀書向上之心卽學臣試士優等者凡屬寒峻終爲生徒下等者苟有資財便爲師長學問文章皆可不論考課懲勸將何所施於國家造就人才敦勵學行之道實有妨礙得旨停止四月命盤查三庫五月諭曰刑部事務較繁杜受田現在專司勘辦實錄館彙本職任綦重雖從前已諭令毋庸赴刑部辦事惟緊要案件例須同堂面商定讞究難兼顧杜受田著加恩以協辦大學士管理禮部事務俾得專勤彙本益昭敬慎八月充順天鄉試正考官先是文廟丁祭遣官禮節自道光二十七年遵奉諭旨刪去自行一叩禮之後復經太常寺奏准刪贊跪承祭官跪一節至是祭酒勝保以未盡允當陳奏命下禮部議覆受田等奏請上香獻帛獻爵時贊引官仍贊跪承祭官仍跪拱舉畢興於酌復舊例之中寓變通盡善之意從之十月以山東被水成災捐銀備賑下部優敘先是兩江總督陸建瀛奏請歲科試生員正場經策改用性理論覆試則用經策各一道取進童生覆試亦改爲經文一道府州縣童試頭場卽默寫聖諭廣訓百餘字並舊用四書文一道性理論一道下禮部議至是受田等疏言生員歲科考之用經文策卽鄉試二三場所用俾練習於平日免

致生疏既不可廢而生童考試之有覆試藉以辨別真偽舊例亦未可改查學政有考試經古一場擬請添性理論生童中有能讀濂洛關閩之書者由學報名送考試以性理論一篇果能有所發明正場文字通順生員准列優等文童准其進取其府州縣考覆試本無一定次數應以一場專考性理論如果說理明晰准置前列至默寫聖諭廣訓查各項考試均應默寫文童考試事同一律應如所請允之二年正月京察屆期諭曰協辦大學士杜受田學醇品正在上書房行走多年深資訓誨現承辦實錄底本詳慎纂輯不遺餘力著交部議敘二月宣宗成皇帝奉安慕陵充隨扈大臣命恭題神主並恭送還京祔廟加二級三月上謁東陵命留京辦事自道光二十年至是年四月歷充大考翰詹閱卷大臣庶吉士散館閱卷大臣順天鄉試覆試閱卷大臣各一次殿試讀卷官朝考閱卷大臣考試試差閱卷大臣各二次旋命偕福州將軍怡良前往江南查辦事件五月偕怡良疏言自去歲豐北缺口山東江蘇被淹賑恤不可稍緩辦理尤須得人藩司爲錢糧總匯州縣官皆其所屬賢能不肖均所素知山東藩司劉源灝居心公正幹練有爲江寧藩司祁宿藻實心任事誠樸廉明請旨飭令二員督辦此次被水地方甚寬

待賑人數尤衆請截留江廣幫漕米六十萬石分撥山東江蘇其水陸若何撥運州縣若何囤積村莊若何給散卽令迅定章程飭委妥辦如所請行六月行抵東境奏被災情形疏言據山東藩司劉源灝聲稱伏秋大汛下游未經疏暢各處秋收豐歉勢難預定災口實數應俟秋收後確查分別辦理儻賑至冬底猶有不敷卽於附近州縣酌動倉穀協濟所見尙爲合宜應如所請至截漕濟賑恐旗丁等攙水和主應請飭下漕運總督於交米時會同盤驗據劉源灝定擬章程十條並鈔錄具奏一奉撥漕米宜限期預籌撥運一撥運處所宜遴委道府大員監盤分運一幫船交兌米石應各糧道親身督盤一江廣各幫應飭迅行北上一奉撥賑米擬就災區酌存一腳費擬請作正開銷一散放戶口宜委員覈實預查一米廠宜城鄉分設以便災民具領一賑濟戶口宜家喻戶曉一放米宜預籌不敷奏入允之七月行抵江南清河縣奏言上年豐北漫口徐屬被災沛縣較重其次則豐縣銅山縣又其次則碭山縣其邳州及宿遷縣受災較輕其桃源清河安東沈陽海州本屬下游勘不成災查自上年十月至今三月沛豐銅碭四縣賑六次邳州三次宿遷一次復於子房山挑通河道以工代賑茲復截漕接濟擬請沛縣撥米

九萬石豐縣七萬五千石碭山二萬三千石銅山五萬石邳州三萬石均於九月
初間開放其池下之宿遷桃源沭陽清河安東海州等州縣應將餘米三萬二千
石酌撥各數千石俟秋汛後酌量撫恤並將藩司祁宿藻籌定章程鈔錄陳奏一
漕船卸米及州縣存儲處所應預先酌定一截留漕米應預籌撥運一州縣領兌
漕米應派道府大員監兌一收回上屆災區賑票應仍委員查覈一查填戶口應
責成各員互相稽查一放米應變通一分廠以免擁擠一按災輕重辦理一附近
口門棚棲災民應照常給恤一州縣運腳應動捐賑餘賸銀兩支發奏入命下祁
宿藻盡心籌畫受田尋卒於差次遺疏入硃批憶昔在書齋日承清誨銘切五中
自前歲春懷承大寶方冀贊襄帷幄讜論常聞詎料永無晤對之期十七年情懷
付於逝水嗚呼卿之不幸實朕之不幸也復諭曰協辦大學士杜受田秉躬端正
礪節直清經術淵醇體用兼備蒙皇考宣宗成皇帝特達之知由詞臣視學山西
特召還朝旋入直上書房爲朕講習討論十餘年中日承啟迪獲益良多嗣經洊
歷正卿忠勤益懋朕親政後加太子太傅銜以刑部尙書協辦大學士特命管理
禮部事務每召見時於用人行政國計民生造膝敷陳深資匡弼前因豐工尙未

堵合江南山東兩省窮黎急需賑恤宵旰焦勞難安寢饋特派前往查辦疊據途次馳報東南賑務均已布置周妥念其觸暑遄征心力交瘁正切惓懷而前後奏摺中總未自陳病狀乃本日怡良等馳奏杜受田竟以感受暑溼觸發舊患肝證於本月初九日遽至不起披覽遺章不覺聲淚俱下悲痛實深回憶書齋景況如在目前奉使陞辭情尤眷戀方冀贊襄帷幄讜論常聞詎料相睽兩月晤對無期耶著賞給陀羅經被由驛發往加恩晉贈太師大學士入祀賢良祠卽照大學士例賜卹任內一切處分悉予開復應得卹典該衙門察例具奏並賞銀五千兩經理喪事靈柩回京沿途地方官妥爲照料護送准其入城治喪屆時朕當親臨奠醊用申悲悃伊父頭品頂帶前任禮部侍郎杜堦年屆九旬猝聞此信定深悼痛著派恩華卽日前往看視併賞給人蔭十兩以資調養伊子杜翰著俟服闋後加恩以庶子補用伊孫三人均著加恩賞給舉人准其一體會試以示朕愴懷舊學恩眷優加之至意又諭曰朕念杜受田之父杜堦年近九旬在京就養猝聞伊子差次病逝自必傷感逾常伊孫杜翰見任湖北學政惟伊次孫杜翻一人在京若前往清江奔喪則伊祖杜堦膝前乏人侍養朕心實深廬念著傳旨令杜翰卽由

湖北馳往清江浦扶柩回京杜翻卽在京侍奉毋庸前往以示體恤尋賜祭葬諭曰據禮部查明應得卹典奏請予諡因思杜受田品端學粹正色立朝皇考宣宗成皇帝深加倚重特簡爲朕師傅憶在書齋朝夕納誨凡所陳說悉本唐虞二代聖賢相傳之旨實能發明蘊奧體用兼賅朕卽位後用諮時政利弊民生疾苦亦能盡心獻替啟沃良多嘉慶年間大學士朱珪仰蒙皇祖仁宗睿皇帝鑒其品節特諡文正杜受田公忠正直媲美前賢揆諸諡法實足以當正字而無愧毋庸俟內閣擬請著卽賜諡文正其餘一切卹典均著照禮部所請辦理用示朕眷懷舊學崇錫令名至意九月諭曰原任協辦大學士贈太師大學士杜受田靈柩現已到京著派恭親王奕訢帶領侍衛十員卽日前往奠醮朕於十月初四日親臨賜奠十月上親詣賜奠諭曰昨日親臨杜受田宅奠醮撫棺灑淚悲悼實深並見其門庭卑隘依然寒素家風追念遺徽益增感愴當日召見伊父前任禮部侍郎杜堉令其兩孫杜翰杜翻扶掖起跪精神尙可支持惟年屆九旬遭此慘痛何以爲情杜堉前已賞給頭品頂戴著再加恩賞給禮部尙書銜其勉自排遣加意頤養以慰朕念將來杜受田靈柩起程回籍時著派恭親王奕訢前往祖奠日送並著

沿途地方官照料護送到籍用示朕篤念舊學有加無已至意三年二月上臨雍禮成諭曰原任協辦大學士贈太師大學士杜受田於道光十六年蒙皇考簡用上書房師傅與朕朝夕講貫發明唐虞三代心傳十餘年間敦敏不倦朕親承啟迪獲益良多卽位後諮訪古今政治利弊暨民生疾苦無不盡心匡弼獻納嘉謨儻能久在左右於時事艱虞尙冀多所補救本日臨雍講學追思曩日討論之功宜沛恩施以昭篤眷杜受田之父杜堦前已賞加禮部尙書銜著再加恩賞食全俸杜受田靈柩尙未歸里著派惇郡王奕諒前往賜祭一次用示朕崇儒重道至意四月諭曰贈太師大學士原任協辦大學士杜受田靈柩回籍前經降旨派恭親王奕訢前往賜奠日送並著沿途地方官妥爲照料護送茲聞初四日起程回籍著加恩於到籍後賜祭一壇派散秩大臣承志前往祭奠以示朕篤念師儒有加無已至意子翰工部左侍郎翻兵部右侍郎孫庭琛翰林院編修庭珪欽賜舉人三品廕生庭璆欽賜舉人

湯金釗

湯金釗浙江蕭山人嘉慶四年進士改翰林院庶吉士六年散館授編修十二年

充順天鄉試同考官十三年三月高宗純皇帝實錄聖訓告成金釗以歷充協修編修總纂議敘遇有應陞之缺開列在前四月命在上書房行走閏五月丁卯憂十五年服闋充文穎館總纂十六年五月遷侍講十二月提督湖南學政時前任學政徐松被參賣書漁利等款經欽差工部左侍郎初彭齡審明得贓屬實十七年三月金釗偕巡撫廣厚遵旨察封徐松任所資財並將各書籍詳細磨對實無自作詩文亦無違悖字跡奏入報聞九月偕廣厚奏請添設永順府保靖縣苗童學額一名下部議行十八年遷國子監祭酒十九年五月陞詹事府詹事六月署文淵閣直閣事充日講起居注官稽察右翼宗學十二月擢內閣學士兼禮部侍郎銜二十一年四月復命在上書房行走閏六月充江南鄉試正考官旋授江蘇學政具摺陳謝硃批教育士子易俗移風勉之母忽九月奏報到任又奉硃批江蘇士子不患無才但須培德勿把持公務勿華而不實經學爲本詞藻次之勉力訓誨務得真才以佐國政金釗卽敬謹闡揚通諭各屬俾鄉僻士子共見共聞咸喻聖諭並具疏奏聞復得旨才以德爲基禮門義路士子必宜躬行實踐勉力造就毋忽二十二年三月陞禮部右侍郎仍留學政任四月江陰縣有會匪煽惑鄉

愚以修善獲福爲說金釗著福善辨刊行曉諭錄稟奏聞硃批所著福善辨簡明透澈可警癡愚亦教化之一助也二十三年以徐州府各屬武風視文風較勝生童內有强悍不馴者以法繩之奏入得旨文武不可偏廢皆宜時加訓迪二十四年回京仍在上書房行走二十五年九月調吏部右侍郎十二月充經筵講官時吏部尙書英和以各省府州縣養廉不敷辦公取給陋規日益加增奏請查明分別應存應革定以限制命下各督撫體察情形議奏兩江總督孫玉庭四川總督蔣攸銛禮部尙書汪廷珍山西學政陳官俊先後奏寢其事金釗疏言陋規皆出於民地方官未敢公然苛索者恐上知之而治以罪也今若明定章程卽爲例所應得勢必明目張膽求多於額例之外雖有嚴旨不能禁矣況名目碎雜各處不同逐一清查難得真確易滋紛擾無論不當明立章程亦不能妄立章程也吏治貴在得人得其人雖取於民而民愛戴之不害其爲清非其人雖不取於民而民嫉讐之何論其爲清有治人無治法惟在各督撫舉錯公明而非區區立法所能限制奏入諭曰昨已降旨停止清查陋規矣朝有諍臣連章入告使朕胸中黑白分明而又無傷於政體朕不勝欣悅之至湯金釗著交部議敘道光元年二月兼

署戶部右侍郎兼管錢法堂事務五月復兼署戶部右侍郎時兩江總督孫玉庭條陳漕務議請八折徵收江蘇學政姚文田御史王家相俱奏寢之金釗遵旨偕軍機大臣及戶部會籌奏覆復疏言康熙年間奉有永不加賦之明詔是培養國脈我大清億萬載無窮之至計也前漕臣蔣兆奎議加徵耗米一斗督臣費淳議每石加增公費六分均經戶部以事類加賦奏駁在案今慮其浮收定爲八折徵收名爲限制甚嚴而實不足以限之蓋前此絲毫不准浮收而浮收過甚者且到處皆然況准其略爲浮收則不肖者益無顧忌勢必至昌言於衆以爲功令不禁浮收而浮收過甚者必多於前矣此雖告之以收逾八折卽予嚴參然前此逾額者何嘗不干嚴辦而浮收者不聞爲之減少獨於新定之額恪遵而不敢踰也臣之所不敢必也在督撫奏定八折之後不慮控告浮收在州縣收逾八折縱有發覺皆藉爲例取而巧脫其罪其自爲謀誠屬至便特限制仍同虛設徒爲盛朝開加賦之端臣竊惜之奏入上復命江浙督撫妥議尋議覆所言不可之處屬實而八折兌收之議遂寢六月充江南鄉試正考官八月以吏部事務較繁命不必在上書房行走十一月復兼署戶部右侍郎兼管錢法堂事務先是江蘇銅山縣北

河渠乾隆二十年開濬計長七十餘里以疏運河嘉慶年間因減洩黃水漸致沙淤每遇歲潦北鄉苦之金釗差旋道經銅山詢知被潦原委並以知縣高攀桂有重濬之議奏請下兩江總督孫玉庭等議行二年正月充國史館副總裁三月充會試副考官調戶部右侍郎兼管錢法堂事務閏三月兼署吏部右侍郎時戶部議令京倉以放代盤經倉場侍郎莫晉奏參盤查易滋紛擾金釗既遵旨於戶部公摺畫彙奏覆復單銜疏言倉儲不宜清查戶部摺內所稱以放代盤之說實未見盤查之利不敢扶同稱爲良法美意惟前議覆時隨同畫彙未能先事獨抒己見應請議處上以倉儲如何不宜清查之處亦未切實陳明命再明白回奏尋奏言不盤查則不虧短若盤查而不認真卽新舊牽混若認真盤查卽難保無虧缺疏入上以其首鼠兩端殊失協恭和衷之義降二級留任旋於次年元日恩予開復九月充武鄉試正考官二年二月上釋奠於文廟命偕吏部尙書盧蔭溥等充分獻官七月兼署吏部右侍郎旋丁父憂六年正月服闋署禮部右侍郎三月充會試副考官六月署倉場侍郎七月兼署工部右侍郎兼管錢法堂事務復命在上書房行走授隱志郡王讀旋授戶部左侍郎十二月大興縣民陸有章等呈請

於宛平等五州縣開採銀礦戶部奏上以附近易州風水所關戶部率行具奏將
尙書英和等下部分別嚴議議處金釗降二級留任七年六月以通州民佃王文
弼等向都察院遞封章控告協辦大學士英和家人張天成等增租擾累偕大學
士託津曹振鏞等遵旨集訊屬實奏將兩造分別治罪如律英和坐徇隱奪任並
下部嚴議七月陞都察院左都御史十月陞禮部尙書尋以山西猗氏縣民閻克
己京控知縣違例勒罰斃命教諭典史串詐得贓命偕刑部右侍郎鍾昌前往查
辦屬實請將猗氏縣知縣張珍臬等奪職署巡撫福綿失察下部議處趙城縣知
縣楊延亮於孟蘭鎖毆斃重案率以失足落溝詳結經其舅孟得陞懷疑捏指正
兇赴京具控金釗等遵旨集訊傷斃屬實請將楊延亮議處另緝正兇均從之十
二月充經筵講官八年三月以給事中託明奏參直隸懷來縣知縣典史藉差苛
派並委員勒結等款遵旨前往查辦尋訊明原參多無確據惟該縣辦差發價採
買柴炭等項書差相沿剋扣典史署向無採買成案亦相率收取奏請裁革並將
知縣呂崇修典史周振恆分別議處允之八月以回疆底定揚威將軍大學士公
長齡等凱旋賜宴金釗與焉十月賜紫禁城騎馬尋以四川三臺縣民劉用遵叩

州民胡占魁大邑縣民張玉秀越雋廳民徐元學巴縣民張正德等京控各案遵旨偕署工部右侍郎鍾昌前往查辦或鞫審得實或虛實參半或砌詞捏控俱先後分別奏辦如律下部議行九年四月回京行抵陝西褒城以湖廣總督嵩孚等奏湖北署房縣知縣王綱於羣毆致斃之案誤作夥劫扶同鄖縣典史張紹宗誣良爲盜經鄖陽府知府李義文平反猶復狡執抗延金釗偕鍾昌折往湖北訊實定讞奏請將王綱張紹宗分別奪職遣戍又已革荊州水師營守備張湖因查鹽起釁與前任四川學政潘光藻互訐金釗等訊明張湖砌詞挾制奏請奪職其搭幫船隻夾帶私鹽潘光藻坐失察下部議處均如所請行六月命充上書房總師傅八月上詣盛京謁祖陵命留京辦事十月閩浙總督孫爾準福建巡撫韓克均以交代未清之署福州府糧捕通判候補知州張騰稟揭督撫家丁收受門包並砌款牽控各廳縣及在籍大員奏請欽差大臣查辦得旨奪張騰職命金釗仍偕鍾昌前往尋訊明張騰係砌款訐控奏請從重遣戍其門包一款訊祇於署糧捕通判任內送督撫門丁各二次計每處八十八兩孫爾準韓克均俱坐失察議處並請申嚴例禁允之十年六月戶部假照案發命偕兵部尙書那清安等會同戶

部將嘉慶二十一年以後庫收小票暨每日江南道磨對原冊查覈尋查出捐冊內有冊內無名彙內竄入者有冊內有名彙內無名者有單名改作雙名者並塗改總數各情弊先後奏交刑部歸案審辦九月仁宗睿皇帝聖德神功碑告成命金釗祭告昌陵旋調吏部尙書十月兼署戶部尙書以前在戶部任內失察假照六百三十一名降四級留任十一年正月充經筵講官二月署翰林院掌院學士五月命降補兵部右侍郎十二年署戶部右侍郎兼管錢法堂事務旋充江南鄉試正考官十三年正月調戶部左侍郎三月充會試知貢舉四月陞都察院左都御史十月陞工部尙書十四年二月兼署吏部尙書尋實授旋充國史館副總裁三月上謁西陵命留京辦事九月候選道淡春臺向吏部司員謀缺賄託案發金釗坐失察降四級留任十五年三月兼署工部尙書八月充順天鄉試正考官十六年三月以御史許球奏參陝西巡撫楊名颺關防不謹牟利勒捐廢弛捕務各款命偕戶部右侍郎文慶前往查辦尋查明楊名颺被參各款尙無贓私情弊惟失察家人與鋪戶交結往來不禁屬員眷屬出入衙署於一家四命重案不知速理兇犯日久未獲緝捕鬆懈奏請下部嚴議五月以通政使司參議劉誼奏請清

查四川捐輸及軍需銀款命偕文慶由陝赴蜀調取簿冊清查無誤又四川布政使及各州縣被參交審各案大竹縣知縣郭夢熊於差役釀命朦詳開脫廣元縣典史董秉義詐贓釀命知縣春明既失察又准攔驗巴縣知縣楊得質收受壽禮違例科罰江安縣知縣夏文臻不洽輿情資州知州高學濂署資州知州薛濟清隆昌縣知縣劉光第辦理津貼不實不盡均先後訊明奏請分別科罪有差前任四川布政使李羲文前在戕邊軍營供張華靡迨凱旋趾高氣揚致招物議其濫保多人經總督鄂山駁減仍對衆肆言以市己恩任性乖張並請嚴議其已經告病之涪州知州楊上容及江津縣知縣郭彬圖係金釧門生查無贓私劣跡並奏言嫌疑之際物議易生敢不從嚴根究惟虛實是非自有公論亦無從周內藉爲遠嫌地步疏入硃批事若秉公問心無愧何恤人言不避親不避怨古人曾言之也勿生疑慮據誠報稱朕所望焉九月由蜀回陝復以楊名颺奏參署按察使督糧道李廷錫任性挾制李廷錫亦稟揭研審紫陽縣一家四命案究出知縣郭思儀刑求逼供知府趙廷俊徇庇捏詳楊名颺因與趙廷俊同鄉屬爲設法消弭並遵諭將楊名颺乾沒工賑袒護同鄉各款查奏尋奏楊名颺於西嶽廟工含混巧

節且於臨潼富平等缺將同鄉謝長年等調補詳審得實上命奪楊名颺職其與李廷錫參訐一款狡詞抵賴復經金釗等奏聞諭曰楊名颺辜恩溺職殊出情理之外業經革職著毋庸議儻再不知自愧曉曉瀆辯必當重治其罪是月署陝西巡撫尋以葭州等九州縣被霜雹歉收奏請分別蠲緩允之十七年正月京察屆期上以金釗品學醇正奉使公明下部議敘二月回京三月署翰林院掌院學士上奉皇太后幸髻髻山命留京辦事十一月以御史張秉德奏參直隸萬全縣知縣陳學源貪婪各款遵旨前往查辦尋訊明陳學源聽從門丁向各鋪戶借貸雖已清還究屬不知閑檢又濫行派買兵米奏請奪職遣戍允之十八年二月以山西已革捐納知縣晏象和因錢債細故輒羅織多人砌款京控並訐巡撫申啟賢瞻徇年誼命偕兵部右侍郎惠吉前往查辦尋訊係虛誣奏請將晏象和治罪閏四月充教習庶吉士五月命以戶部尚書協辦大學士偕軍機大臣大學士穆彰阿等議覆兩江總督陶澍等預籌積儲一摺疏言據原奏籌備天庾積儲總宜設法辦理請嗣後遇江南各省大熟之年糧價平減卽酌量採買委員由海運解其米本等項卽於災緩截留案內查覈融辦應如所請惟米價尤須查明嗣後應令

該督等察看情形遇年豐穀賤可以採買卽飭查市穀糧價以制錢合照紋銀時價估報並估定上海運至天津由津運通腳價詳悉奏明請旨由戶部撥銀辦理至節年災緩等款雖非新賦屆限既應帶徵帶解卽係正供應有之項未便聽其融辦允之八月兼署吏部尙書九月實授十月以安徽鳳陽府屬生童赴廬鳳穎道署滋鬧經學政王植奏聞命偕刑部左侍郎文鎔前往查辦十九年正月訊屬實請照例懲治並以廬鳳穎道胡調元辦理未善及失察之鳳陽各屬教職奏請分別議處又遵旨將旌德縣民金貴保京控命案訊出賴債裝傷受唆誣告各情奏請治罪如律俱下部議行二月復偕吳元鎔遵旨赴浙江將御史高枚所參各員查辦尋訊明前任岷縣知縣何瑞榴失察革書懋缺影射門丁歛分受賀署杭捕同知韓紹晉雖無劣跡官聲亦屬平常均奏請奪職允之先是御史周春祺奏江南漕弁養匪害民伍長盜米病丁並劾江寧布政使唐鑑於江寧省城爲女建祠任令胞弟唐紫玖署外居住恐有屬員夤緣鑽刺情弊三月金釗復遵旨前往查明將武弁運丁分別懲辦唐鑑之弟無倚勢招搖劣跡查省城有唐鑑之故父祠堂其女有墳無祠惟任令其弟在署外居住應請交部議處如所請行又以江

南河道總督慶麟奏請興修惠濟福興兩閘要工金釗順道勘實奏覆允行是月御史蔡家珩奏河工賠項逾限不完新定處分過於寬縱並指參辦理此案全係金釗一人在工部吏部尙書任內有徇私錯謬情弊金釗回京途次遵旨以前議處分章程非一人所能專擅至所稱徇情迴護請託不敢置辯惟求查辦具疏奏覆嗣蔡家珩又遵旨回奏情託本屬機密豈有實據並聲稱前在工部司員任內回此稟時欲將稟底送與管理工部之大學士曹振鏞閱看經金釗阻止等語上復命金釗據實具奏尋奏言此案蔡家珩擬稟面回時因原稟處分業經吏部奏定加重且總督及屬員一律辦理亦多窒礙未便率行具奏令其回明各堂官商酌是實諭曰此案處分輕重原應權衡至當湯金釗於司員擬稟面回時卽當親與各堂官商權何以令湯金釗聽受情託既未能指出實據復以事隔多年忽行陳奏亦有不合湯金釗蔡家珩均交吏部都察院分別議處金釗降二級留任先是景陵茶膳餼餉房縱火要犯八年之久未經緝獲至是守護東陵鎮國公宗室景綸等有意邀功工部郎中宗室敕功等迎合見好輒將形跡可疑之人煨鍊入奏經刑部平反得旨將景綸等交宗人府及吏兵二部嚴議敕功等承審不實奏

請降調上以吏兵二部堂官於特交嚴議之案並不將全案情節及誤入人罪詳細覈議率以尙未成招一語巧爲開脫交各衙門議處金釗降四級留任五年五月偕宗人府宗令肅親王敬敏奏議鴉片煙吸食興販及官員失察胥役賄縱商舶窩藏關津偷漏棍徒冒充官人姦民栽贓誣陷各罪名三十九條得旨允行八月命查三庫兼署戶部尙書二十年正月理藩院收存西藏商上喇嘛銀兩案發遵旨偕定郡王載銓等鞠實奏將尙書宗室奕紀奪職遣戍自嘉慶十九年至是年歷充會試覆試閱卷大臣三次殿試讀卷官四次朝考閱卷大臣五次庶吉士散館閱卷大臣考試學正學錄閱卷大臣各二次拔貢朝考閱卷大臣考試試差閱卷大臣考試漢教習閱卷大臣各一次自十九年至是年八月三次釋奠於文廟命金釗行禮十月上謁西陵命留京辦事二十一年復署翰林院掌院學士先是二十年金釗將吏部員外郎陳起詩派送倉差陳起詩以見有監糶土米差使呈請改派當卽應允並將呈詞內堂標日期空補發還諭令無庸再向各堂呈遞至本年陳起詩聞復保送遂指名在部訐控以上空補日期之原呈爲據經吏部尙書宗室奕紀奏聞金釗遵旨明白回奏並軍機大臣傳詢陳起詩得實均下都

察院嚴議尋議入上以陳起詩擅遞呈詞意圖規避照議奪職金釗亦以錯謬降四級調用二十二年授光祿寺卿具摺陳謝卽以衰老籲請開缺並聲明家無住屋仍寓京中得旨俞允賞二品頂戴二十三年戶部銀庫虧短案發金釗前經查庫奪職並勒限罰賠嗣於限內如數完繳得旨開復二十九年孝和睿皇后陞遐上居苫次金釗具摺請安賞頭品頂帶咸豐元年以捐備軍餉下部優敘四年以鄉試中式年屆周甲諭曰頭品頂帶致仕光祿卿前任吏部尙書協辦大學士湯金釗係乾隆甲寅科舉人見在年逾八旬重遇鹿鳴允宜特沛恩施以昭榮遇著加恩賞太子太保銜並頒給御書扁額准其於明年乙卯正科就近在順天府重與鹿鳴筵宴六年卒遺疏入諭曰頭品頂帶致仕光祿寺卿湯金釗立品端方學問醇正由翰林洊擢正卿協贊綸扉疊司文柄供職恪勤嗣因降補後奏請休致蒙皇考宣宗成皇帝賞給二品頂帶復賞加頭品頂帶朕御極後因其重與鹿鳴筵宴賞加太子太保銜方冀克享遐齡長承渥眷茲聞溘逝軫惜殊深著派載崇帶領侍衛十員卽日前往奠醊加恩照尙書例賜卹任內一切處分悉予開復應得卹典該衙門察例具奏伊孫大理寺評事湯學淳著俟服闋後交吏部帶領引

見用示朕篤眷耆臣至意尋賜祭葬予諡文端子寬陝西鳳翔府知府修通政司副使孫學海員外郎學治山西岢嵐州知州

宗室敬徵

宗室敬徵鑲白旗人和碩肅恭親王永錫子嘉慶十年封不入八分輔國公賞頭等侍衛十一年授委散秩大臣十七年二月授正白旗漢軍副都統七月署鑲黃旗蒙古副都統十八年充正藍旗宗室總族長九月兼鑲黃旗護軍統領十九年八月授鑲黃旗護軍統領十月授內閣學士兼禮部侍郎銜十二月署正藍旗滿洲副都統二十年四月調正紅旗滿洲副都統十月授鑾儀衛鑾儀使二十二年以前在總族長任內失察宗室海康慶遙等習紅陽教革職旋賞四品頂帶仍充總族長嗣翰實海康等從逆罪狀敬徵復革去頂帶總族長發往盛京居住二十三年賞四等侍衛在大門上行走二十五年命在乾清門行走道光元年二月擢三等侍衛三月復賞四品頂帶二年二月擢內閣學士兼禮部侍郎銜五月署正白旗滿洲副都統八月署刑部左侍郎十月授鑲紅旗漢軍副都統旋陞工部右侍郎兼管錢法堂事務三年正月調鑲藍旗滿洲都統尋兼總管內務府大臣四

月奏言寶源局鼓鑄錢文物價較昔增昂辦公不無支絀請將增復料錢一項借給十五年俾資調劑卽在增復款內分年坐扣歸款允之十月管理圓明園八旗內務府三旗事務四年四月管理欽天監國子監及算學西洋堂事務七月調戶部右侍郎兼管錢法堂事務五年三月管理暢春園並咸安宮官學六月充翻譯錄科考試官七月充崇文門副監督六年二月管理右翼幼官學充前引大臣九月轉左侍郎十二月大興縣民陸有章等呈請於宛平等五州縣開採銀礦經戶部據呈入奏上以畿輔重地且附近易州一帶詎可輕議開挖戶部堂官不加詳察率行代奏敬徵隨同畫諾降二級留任七年三月命承辦萬年吉地工程九月奏請添兵守護得旨允行並賞戴花翎下部議敘十二月復兼署戶部錢法堂事務八年三月以長蘆鹽政阿揚阿奏籌歸補帑課章程命偕戶部尙書王鼎前往查辦四月疏言蘆商疲敝已極本年應交正雜及帶徵銀兩若令照限起徵商人力有不逮若再量加展緩整飭鹺務首重年清年款先將節年帶款逐加釐剔則見年正款不難清完查原奏以道光二年以前未完銀爲舊欠三年以後未完銀爲新欠分別歸補係爲緩舊徵新按年清款起見惟請以堰工加價二文全數歸

商實漫無限制擬仍照道光五年奏案以一半完商欠俟新欠清後再將舊欠抵完至六七兩年未完加價銀兩於本年八月起按半年一提分五限徵完解部其八年春秋二季應徵加價令年內全完以免延宕又查蘆商生息帑本內有直隸水利銀趙北口水圍備用銀兩款均非歲需經費應援照成案停利三年限滿後加一倍利完繳其舊應拔繳息銀併停徵三年俟屆限時將新舊拔繳各款配勻帶徵以卹商力至近年蘆商疲乏不能豫買生鹽存坵新鹽質嫩易消致多滷耗請准於每包定數外加鹽二十斤免其交課俾資貼補下部議行七月奏言繙譯同考官向由各衙門申送精通之員爲數無多其揣摹夤緣之弊不可不防擬請裁撤專令閱卷大臣全數校閱以杜弊端從之九年七月調正紅旗滿洲副都統時上詣盛京恭謁祖陵敬徵借尙書禮恩等奏言向來地方官藉差苛派指稱內廷支應款目例外需索無非藉此開銷彌補虧欠應請命順天府尹直隸總督等飭屬革除一經發覺俱照新例治罪從之十月賞穿黃馬褂並管理上駟院事務十二月充右翼監督十年三月署泰寧鎮總兵兼管內務府大臣十月以失察捐納房書吏蔡繩祖等私造假照降四品頂帶留任十一年二月命偕工部尙書穆

彰阿恭辦龍泉峪萬年吉地工程八月恭遇上五旬萬壽賞還二品頂帶十二年正月署經筵講官十月以河南于家灣姦民盜決官隄命偕工部尙書朱士彥前往查辦十三年正月奏言于家灣正壩合龍惟壩下尙未閉氣西壩亦閒有墊矮得旨趕緊加鑲追壓堅實不得稍有遲誤又奏劾已革通判張懋祖賠修壩工仍不認真致損壞更甚請在工枷號責令迅速賠修上是其議時江南河道總督張井以河湖各工殘損奏請分別估辦命偕朱士彥就近覆勘尋疏陳擇要興修各款一高堰山圩所屬卑矮石工俟新工賠補後改砌碎石分年覈辦一舊信壩補還石工智壩仁河義河壩俱填修石底其壩下束水二隄亦應補還缺口一裏河福興正閘場卸情形較重應令於本年趕緊修築一揚河西岸加高包砌碎石並倒卸輒石各工擬令改拋碎石允之先是穆彰阿等審擬盜決案犯經部議駁命敬徵等覈審至是以奸民陳堂等聽從逸犯陳端糾衆窆隄應比照光棍爲從例問擬聽糾及被脅各犯應分別量減其疏防各官均請從重發往軍臺以爲玩視河防者戒奏入下部議行時准北綱鹽積年滯銷兩江總督陶澍議票引兼行之法奏請試辦已奉諭旨御史周彥以票鹽利梟而不利課其可慮者有三入奏復

命敬徵會同陶澍體察情形通盤籌畫尋奏言票鹽納課迥異於場竈起徵於課並無不利原奏以借官票運私鹽爲一可慮查淮北民販挨次到卡抽驗人人各顧資本固無不遵約束至兵役賄庇有犯必懲亦知儆惕似無可慮也又以銷滯岸侵暢岸爲二可慮查本年七月以後商販請運逾額實由趁水趕運且票鹽成本輕減得價卽銷銷數較多其未改口岸不准請運是暢岸卽未侵及似亦無可慮也又以占馬頭起爭鬪爲三可慮查行票各岸聽民請運並不甲乙分占極遠滯岸經委員領票倡導民販望風附從各銷各鹽無所爭鬪似皆無可慮也得旨仍照原議妥辦五月陞正紅旗蒙古都統十一月賜紫禁城騎馬十四年正月調鑲黃旗漢軍都統二月署都察院左都御史七月實授時浙江巡撫富呢楊阿以海塘各工漸多坍塌奏請興修先後簡派刑部右侍郎趙盛奎原任河東河道總督嚴烺盛京工部侍郎烏爾恭額等查議章程意見互異九月命敬徵偕戶部右侍郎吳椿前往會勘折衷一是十一月奏言此次修理塘工前議由念里亭汛至尖山汛於石塘外改鑲柴工尙能抵溜惟應將坍卸石塘卽時修整完固至鎮海汛及戴家橋汛原議改建竹篁塊石雖係成法但自乾隆四十五年以後查無辦

過成案而保護鱗塘之法以修復條石坦水較爲得力應請仍照舊法惟各工未能同時並舉請將烏龍廟以東原奏增建鱗塘工程暫爲推緩俾得專辦要工允之旋召回京陞兵部尙書復調工部尙書進內大臣班十五年正月充文淵閣提舉閣事三月復兼署都察院左都御史閏六月以奉移孝穆成皇后孝慎成皇后梓宮至龍泉峪欽天監諷吉未協諭曰敬徵管理欽天監有年於諷吉宜忌素爲熟諳此次所擇奉安日期紕繆至此且經朕指出並不具摺請罪種種荒謬實屬辜恩溺職著革去尙書都統及一切差使拔去花翎賞給三品頂帶留內務府大臣並仍管欽天監事務以觀後效九月以龍泉峪工程妥善復二品頂帶並賞還花翎十二月授鑲紅旗滿洲副都統十六年三月復署戶部右侍郎兼管錢法堂事務五月擢鑲紅旗蒙古都統七月復署都察院左都御史九月實授十一月授內大臣尋遷工部尙書先是河東河道總督栗毓美奏輒工屢著成效請設窑燒造已得旨准行御史李莼疏陳其不便十七年五月命敬徵赴東河查辦並令李莼隨同往勘七月奏言河臣議多辦輒工以期減埽節費見經履勘其拋成蟄定之工尙屬整齊惟是密採輿論皆謂水淺溜緩之處拋輒壓石以及保灘護崖均

堪得力至水深溜急之處有輒石並用始站定者有屢拋屢塌改用埽工方穩固者用輒搶辦險工未可深恃夫治河之法不外以土制水鑲埽以料合土取其柔能抵剛碎石質重體堅取其剛以濟柔輒本土成可濟料石之不足今舊輒搜盡勢須燒造但沿河土性沙鹹斷難堅實且近隄例有取土之禁近料宜防意外之虞應請停止又言燒輒已停應以改辦碎石爲急務請自本年始將豫提防險銀十萬兩儘數採辦碎石限明年伏汛前運工其舊例於添料銀十萬兩內以六成購石仍照常發辦如所請行十八年正月充經筵講官四月管新建營事務閏四月兼管造辦處時長蘆革商金易呈控綱總牽涉運司文綸支發扣平等款經鹽政鍾靈參奏上命敬徵往按之尋訊明革商金易欠銀既未完納復砌詞稟託意存挾制按問如律五月調鑲黃旗漢軍都統六月充鑲黃旗宗室總族長十一月調鑲紅旗滿洲都統十九年三月以裕豐倉關領甲米花戶舞弊經領催等呈驗米色與廩內不符奏請交刑部審辦從之二十年正月佩帶內務府總管大臣印鑰并管理新建精捷營事務三月兼署戶部尙書七月兼署兵部尙書吏部尙書二十一年三月管理行營事務並署鑲黃旗領侍衛內大臣四月奏劾內務府護

軍統領廣敏挑缺不公上命褫廣敏職五月調戶部尙書六月奏言公主下嫁章程請將府第長史一員由現任員外郎內管領副管領選補頭等護衛一員二等護衛二員由內副管領驍騎校護軍校選補均令食原俸毋庸開缺允之八月充崇文門監督二十二年八月江南揚河漫口河道總督麟慶以黃水歸海流行未定議堵議改驟難決計奏入命偕工部尙書廖鴻荃前往詳勘十月奏言改河之議原屬因勢利導今查灌河海口至蕭莊口門三百六十餘里新河正溜由六塘出達灌口其下游東北一百十里滔滔直注惟當潮長之時黃水相逼壅遏不前而上游自口門至響水口二百餘里其支流忽分忽合必須南北兩岸築隄束水方免泛濫之虞但兩岸隄長三百餘里經費旣慮難籌而漕運尤關緊要見在中河運道被黃流橫截不得不移塘灌運而清水本弱導入無多仍賴借黃濟運空船且引轉需時想重運更形艱滯是移塘中河不過一時權宜之計設使常年照辦水勢艱難似於運道有礙至若舊黃河自蕭莊以迄舊海口四百二十餘里尾閘本屬寬暢自本年漫口斷流河身益淤非挑濬難望深通擇其利漕便民者惟堵築漫口輓歸故道雖堵口挑河等費約需銀五六百萬兩然較改河築隄節省

實多請俟明歲春融興工挑挖淤墊再俟軍船回空後築壩合龍庶撥款既可寬紓而工程亦臻穩固得旨允行是月回京命以戶部尙書協辦大學士尋以失察內務府庫掌珽璋等私造印信冒領庫款革職留任十二月疏言京察屆期請將內務府署卿司員由總管大臣明定等第一體註考其二院卿員將履歷咨送吏部隨各衙門京堂一體帶領引見如所請行二十三年正月奏言各衙門人役出入禁門向由內務府頒發腰牌惟未註明某處人役不免私相換帶請照原設腰牌添註各處人役名目另鑄火印戳記頒發佩帶自本年二月一律更換以示區別而重門禁允之三月戶部銀庫虧短案發敬徵曾任查庫大臣以失察按坐如例上仍命敬徵偕定郡王載銓等嚴行查辦設法彌補四月議奏歷任管庫查庫王大臣及御史司員等查明年分次數分別罰賠並擬將庫支各款減平兌放以節經費均從之六月命赴南河偕戶部右侍郎何汝霖查勘大工事宜行抵山東以豫省中河廳九堡漫口奪溜南趨諭令折回前赴東河查勘閏七月奏參失事已革通判王葵初請在工所枷號上是之時以兩河連年漫溢制用甚繁經部議准於東河暫開捐輸御史雷以誠奏請兼准交納糧石料物按銀折算御史李恩

慶奏請製造紙鈔發工次招商民交給均飭交敬徵等悉心妥議尋奏言向來設廠購買稽料剋期足額若令捐生交納既不如交銀之便且市價靡常折算無準事屬難行至所稱捐納米麥雜糧係儲備民食起見惟運赴工次及交附近各州縣存放易滋流弊應飭令願捐糧石者由藩司查覈歸入捐輸款內議敘以爲賑濟災黎之用至楮幣之法見於唐之飛券宋元以來始有父子會子寶鈔之制前明洪武時行鈔法數年卽壞今需用孔亟若待部頒印鈔招募商民交錢應用實緩不濟急且事涉創辦商民未必樂從所奏應毋庸議又言近年黃河中滿灘面積淤愈高隄身日形卑矮以致東南兩河疊次失事見估實壩工挑河銀數共需五百十八萬餘兩比祥工較省均得旨允行二十四年敬徵六十生辰御書龍字福壽字並諸珍物賜之二十五年正月奏言河南蘭陵縣下北河廳之廟工地方係北岸七廳適中處請令河臣常川駐筭庶於上下游控制得宜尋河道總督鍾祥疏稱不便諭曰河工修防緊要必需酌量變通以期周密嗣後著該河督於伏汛前半月遷駐廟工先時布置立冬後回濟二月以濫保駐藏大臣孟保副都統命革去協辦大學士尙書都統以內閣學士候補三月補內閣學士兼禮部侍郎

銜四月授正黃旗漢軍副都統並管理圓明園事務尋擢工部尚書八月因病陳請開缺允之二十六年又以濫保科布多參贊大臣果勒明阿副都統褫職三十年賞副都統銜署正白旗滿洲副都統仍因病久未痊疊次奏請開缺俱賞假調理咸豐元年卒遺疏入諭曰署正白旗滿洲副都統宗室敬徵在嘉慶年間曾任內閣學士復由侍衛蒙皇考宣宗成皇帝加恩擢至尚書協辦大學士管理諸務倍著勤勞旋經因事革職朕卽位後念其終日辦公尙屬認真賞給副都統銜正思加恩任用乃因骹疾未愈兩次賞假調理寬予限期方冀漸次就痊可資倚畀遽聞溘逝悼惜殊深著賞加一品銜照尙書例賜卹任內一切處分悉予開復應得卹典該衙門察例具奏伊子文舉恆恩著俟百日後由該旗帶領引見尋賜祭葬予諡文愨子恆恩都察院左副都御史孫盛昱翰林院庶吉士

宗室奕經

宗室奕經鑲紅旗人和碩成哲親王永瑛孫多羅貝勒綿懿子也嘉慶二十一年由四品宗室賞頭等侍衛在乾清門行走尋封二等輔國將軍二十二年八月授尙茶正九月擢奉宸苑卿二十三年二月遷內閣學士兼禮部侍郎銜四月兼鑲

藍旗漢軍副都統十一月管理健銳營事務二十四年調鑲藍旗滿洲副都統道光元年兼正藍旗護軍統領二年充左翼監督管理火器營事務三年坐失察悖親王府人肩輿擅由神武門中門行走奪護軍統領罷乾清門行走仍下部嚴議尋議褫職上加恩留內閣學士任四年六月兼正黃旗護軍統領尋兼正白旗蒙古副都統七月以保舉副護軍參領那爾紅弓箭射無準復奪護軍統領五年二月署鑲白旗護軍統領三月復管理火器營事務四月陞兵部右侍郎十月調正白旗滿洲副都統六年正月充左翼監督管理火器營二月署鑲白旗護軍統領三月充大挑舉人大臣八月以恭纂仁宗睿皇帝聖訓命偕大學士託津禮部尚書松筠校勘清文十二月兼正黃旗護軍統領七年五月調工部左侍郎兼左翼總兵閏五月署步軍統領七月充崇文門副監督八年六月兼右翼前鋒統領七月署步軍統領九年正月復命在乾清門侍衛上行走二月調左翼前鋒統領三月上親閱巡捕五營兵部伍森嚴技藝嫻習以奕經督率有方下部議敘八月扈駕詣盛京謁三陵禮成加一級十年回部逸匪滋事命偕欽差大臣大學士公長齡馳往剿辦事旋平回京調鑲黃旗滿洲副都統吏部右侍郎十一年九月坐

選補甘肅木壘營守備蘇勒芳阿技藝生疏未能據實甄劾下部議處十月轉左侍郎十一月署戶部右侍郎兼管錢法堂事務十二年二月管理上虞備用處事務四月充庶吉士散館閱卷大臣十三年充經筵講官十四年二月充崇文門副監督七月調戶部左侍郎九月候選道淡春臺謀缺賄屬吏部司員聽情瞻徇案發奕經以前任吏部侍郎坐失察降四級留任十二月授黑龍江將軍十五年正月調盛京將軍命覆勘永陵應修工程六月奸匪張幘才糾夥越邊入圍場肆掠奕經飭屬偵獲之得旨下所司按治並命妥議圍場章程七月奏陳六條一禁私鑄鳥槍一禁私藏火器一禁接濟奸匪口米一添發木籌派兵循環嚴查一山犯加等治罪一解役疏脫賊犯從重究治報聞八月奏請撥借庫款發商生息爲添設操防馬匹經費又請墊款買補內倉米石由歷年兵餉分季扣還俱如所請行十一月奏吉林雙城堡屯田向由京旗撥丁往墾報明立冊稽察其由金州撥往者亦如之近來金州等處旗民往往私行充丁幫作請申定章程約束稽察以免戶籍牽混上韙之十六年二月上以興京鳳凰城所屬邊門以外賊匪偷砍木植未能肅清歷年所獲私木舊禁發商變價辦理亦未盡善命奕經妥議章程具奏

尋奏言奸民罔知法紀惟在邊卡認真防守實力緝拏而尤在杜其銷售之源嚴查財東窩主更於山河要隘扼其轉運之路庶知所儆畏日就肅清至舊存邊外木植請仍照前存放其成材之料可於內河輓運者請遇盛京工部歲修揀選以資工用其邊內木植應請招商估變得旨籌議章程內嚴拏財東窩主一條最爲扼要餘均照議妥辦四月奏言巴爾虎自遷駐盛京戶口不蕃所有添設巴爾虎佐領等每遇缺出不敷揀選請將蒙古巴爾虎佐領以下員缺除巴爾虎世襲佐領二員外照揀選協領例蒙古與巴爾虎合併通選以歸畫一下部議行九月以梘口等卡界內有匪徒偷窆窖坑堵截鹿隻奏劾失察之統巡總巡及守卡各員並以梘口輝發霍吞二卡倫地勢遼闊稽察難周請將珠魯蟒喀卡倫移向柳河身以東擇要安設其各卡界內添派熟悉山廠協領一員不時往查從之旋授吏部尙書兼步軍統領正紅旗漢軍都統十一月賜紫禁城騎馬十八年正月管理戶部三庫事務四月充庶吉士散館閱卷大臣閏四月調正黃旗滿洲都統十九年六月奏宛平昌平界妙峰山廟宇每年四月間旗民男婦燒香有匪徒藉端糾衆異服異言私立會名斂財煽惑應請嚴禁以肅畿甸允之七月以刑部平反孫

三等於景陵茶膳房放火一案吏部遵議原審各員處分坐輕縱未能允協奕經降四級留任十月奏請考試蒙古字畫筆帖式照考試清漢繙譯筆帖式例先行較試馬步射得旨著爲令二十年正月授正紅旗宗室總族長七月充崇文門監督十月署工部尙書二十一年二月命以吏部尙書協辦大學士三月署理藩院尙書時英吉利船駛擾浙江陷定海鎮海二縣及寧波府城命奕經爲揚威將軍偕參贊大臣文蔚特依順馳往剿辦十二月由蘇州進駐浙江省城二十二年正月督兵進駐紹興府檄諸將襲剿寧波府及鎮海縣城入其郛不克仍卻退二月英軍襲長谿嶺及慈谿山軍營副將朱貴等死之奏入諭暫令帶罪立功尋密飭文武員弁於鎮海城外乘夜進攻焚其舟三月又於定海十六門洋面乘潮進擊燬英船數十殲英兵數百捷聞賞換雙眼花翎並下部優敘四月英軍竄出寧波府城陷乍浦奕經等未能先事預防革職留任奪雙眼花翎尋攻定海獲勝賞還雙眼花翎偕欽差大臣耆英議攻議撫各陳所見諭曰閱各摺顯有意見不合之處當此軍務喫緊之時正宜各矢公忠和衷共濟攻以助守之勢守以堅攻之心斷不可稍分畛域致失事機至各處失陷均由士氣不揚所致該將軍等惟有將

順逆之故剴切曉諭並將首先潰散之將備兵丁查出卽軍法從事以儆其餘若再一味姑容縱添兵益將亦復何益六月英船復竄出乍浦犯江南陷鎮江府城直逼江寧省城上命奕經赴援旋命駐王江涇一帶防堵九月英人就撫召來京十月諭曰上年英軍竄入閩浙滋擾定海鎮海寧波相繼失守爰命奕經爲揚威將軍文蔚特依順爲參贊大臣前赴浙江徵調各路精兵俾得克復三城用揚我武乃奕經等駐紮蘇州省垣籌畫數月集兵募勇以期一鼓成功覽所呈分路埋伏水陸並進各圖說其運籌非不周而無如謀事不密先期漏洩以致該英人處處皆有準備我兵到彼不能得手因之乍浦失陷傷我弁兵且直犯長江毫無畏忌是奕經祇知株守一隅不圖收復勞師糜餉誤國殃民前已有旨飭令回京著交刑部治罪以示懲儆尋革職議斬監候得旨交宗人府監禁二十三年三月偕已革大學士兩廣總督琦善等起用奕經蒙賞四等侍衛充葉爾羌幫辦大臣御史陳慶鏞以奕經等起用刑賞失措奏入諭曰琦善等革職治罪因思從前辦理不善總由朕無知人之明以致喪師失律迄無成功朕惟有返躬自責愧悔交深何肯諉罪臣工以自寬解琦善等韜略未嫻限於才力現在年力正強是以棄瑕

錄用予以自新今據該御史剴切指陳請收成命覽其所奏抗直敢言朕非飾非文過之君用人行政一秉至公初無成見豈肯因業有成命不便收還自存迴護耶琦善奕經著革職卽令閉門思過十月賞二等侍衛充葉爾羌參贊大臣二十四年調伊犁領隊大臣二十六年以上年剿辦布魯特進卡滋事英吉沙爾領隊大臣齋清額任聽伯克等誣拏良回指稱張格爾逆裔奕經違旨前往查訊率據承審員弁刑逼取供奏請治罪伊犁將軍布彥泰薩迎阿等先後遵旨確查據實平反入奏諭曰奕經審辦此案並不悉心研鞫任聽委員刑逼妄訊著卽革職發往黑龍江充當苦差三十年釋回咸豐元年三月賞藍翎侍衛充伊犁領隊大臣五月賞二等侍衛調英吉沙爾領隊大臣二年正月授工部左侍郎尋調刑部右侍郎兼鑲黃旗漢軍副都統九月署步兵統領十月賜紫禁城騎馬三年三月粵匪由楚蔽江東竄陷江南江寧鎮江及揚州府江北戒嚴命奕經率密雲駐防官兵馳赴山東偕巡撫李惠扼要防堵賜銀兩及衣料一襲尋駐江南徐州九月授鑲藍旗滿洲副都統十月卒於軍遺疏入諭曰刑部右侍郎奕經曾任尙書協辦大學士屢次獲咎經朕棄瑕錄用派令統帶官兵至徐宿一帶防剿斬獲首要匪

犯多名一切布置尙合機宜前因感患瘧疾賞假調理方冀速痊藉資倚畀遽聞溘逝軫惜殊深著照侍郎軍營病故例賜卹任內一切處分悉予開復尋賜祭葬嗣子載鏗進士刑部主事

宗室禧恩弟裕恩

宗室禧恩正藍旗人和碩睿恭親王淳穎子由應封宗室於乾隆五十八年賞戴花翎嘉慶六年正月賞頭品頂帶二月授頭等侍衛命在乾清門行走七年考封二等鎮國將軍八年補尙茶正十年九月陞鑾儀衛鑾儀使十一月兼正藍旗蒙古副都統十一年二月授御前侍衛十月兼上駟院卿十二月轉奉宸苑卿十四年命偕侍衛永芹等詣通州盤查倉廩十五年陞內閣學士兼禮部侍郎銜十六年充崇文門左翼監督十七年四月署鑲白旗護軍統領旋授正黃旗護軍統領充奏事處領班十二月稽察中書科事務十八年正月充嚮導大臣六月調鑲白旗滿洲副都統九月遷理藩院右侍郎十九年正月轉左侍郎二月調兵部右侍郎閏二月復兼鑾儀衛鑾儀使管理清漪園旋以馬上武藝平常命退出御前侍衛二月管健銳營事務五月兼鑲白旗護軍統領七月上閱鑲白旗章京護軍箭

射責禧恩訓練不精革護軍統領九月轉左侍郎十一月管圓明園事務二十年正月授總管內務府大臣七月以散直過早貽誤召見拔去花翎并罰銀一千兩時上巡幸熱河藺溝密雲等處橋座爲雨沖圯飭禧恩先期前往督修剋日工竣賞還花翎並賜黃馬褂及衣料八月充崇文門副監督九月署戶部右侍郎兼管錢法堂事務二十一年二月以扈從官兵馬匹在京住歇例無乾銀禧恩等違例奏請賞給下部議處四月上駟院呈進馬單得旨賜禧恩一匹閏六月直隸總督那彥成以商挪賑銀津貼腳價事覺命偕大學士託津馳赴保定褫那彥成職逮問解京七月管造辦處事務二十二年調戶部左侍郎二十三年充御前對引大臣二十四年二月署左翼總兵七月因督辦白溝河驛路工程穩固得旨嘉獎下部議敘九月復授御前侍衛二十五年正月命進重華宮偕儀親王永璇等二十二人聯句三月調右侍郎兼管錢法堂事務七月仁宗睿皇帝升遐命恭理喪儀八月命在御前大臣上學習行走賜紫禁城騎馬九月管御書處事務尋轉左侍郎管樂部事務道光元年七月充滿洲繙譯鄉試正考官八月授御前大臣命在領侍衛內大臣上學習行走署正藍旗漢軍都統旋充後扈大臣賜紫韁二年正

月兼正紅旗漢軍都統二月兼鑾儀衛掌衛事大臣管理圓明園八旗內務府三旗事務閏三月陞理藩院尙書六月調鑲白旗滿洲都統管理咸安宮蒙古學唐古特學事務時典禮屢舉樂部尙設署史不敷奏請於定額二百名外添設七十名從之尋理藩院議覆烏里雅蘇臺將軍特依順保奏驅逐烏梁海地方潛聚之哈薩克人犯請勒限遷徙並添設卡倫駐兵防守各章程應如所請嗣因司員珠拉等聽吏部尙書松筠之屬於議奏定稿後將摺底送閱刪改禧恩據實劾奏上責松筠越分干預立加嚴譴禧恩知情不早陳奏又失察司員送稿下部議處尋調工部尙書仍署理藩院尙書十二月充經筵講官三年充庶吉士散館閱卷大臣四年閏七月充崇文門監督八月授鑲黃旗領侍衛內大臣五年五月管理奉宸苑事務七月充閱兵大臣六年調戶部尙書兼正黃旗滿洲都統八年上以禧恩屢從勤慎管理諸務俱能妥協賞太子少保銜署吏部尙書九年四月充庶吉士散館閱卷大臣七月疏劾直隸行營地方辦差官向州縣例外苛派指稱內廷各項支應請飭府尹總督將軍查明積弊嚴定罪名從之八月隨扈盛京上追念睿忠親王多爾袞者定大勳賞延後裔賜禧恩雙眼花翎十年四月命偕禮部尙

書耆英等相度萬年吉地專司經理閏四月查出捐納房書吏龐瑛蔡繩祖等偽造印文舞弊奏請下部嚴究九月以阿克蘇兵糈由烏魯木齊馱運道遠費多請飭附近各城採買俱如所請尋充總諮達十月以失察書吏私造假照案降二品頂帶留任十二月請釐正見行常例監生捐款仍使與月給膏火三兩成數相準照舊捐銀一百八十兩從之十一年正月命查海淀石路工程請飭承修草率各員分賠將偷減之工役治罪五月查出戶部山西司漏辦文案二百餘件奏請將承辦司員嚴議八月上五旬萬壽賞復頭品頂帶旋疏請旗員虧空關稅除實係家產盡絕均令依限賠繳不准扣俸抵銷又議各省徵解錢糧三年比較分數請將徵解不足之藩司議處全完者議敘得旨俞允著爲令尋署兵部尙書十二年湖南永州逆獠趙金隴作亂命偕盛京將軍瑚松額馳往剿辦旋經總督盧坤奏敗賊於羊泉鎮殲趙金隴並擒其子弟趙幅金等上諭禧恩覆查確實五月馳抵衡州知趙逆就殲餘匪奔竄粵獠趙仔青復糾合二千餘人竄擾楚境禧恩率提督余步雲總兵曾勝等追剿迅卽殲除奏入上嘉之因偕湖南巡撫吳榮光奏辦善後事宜九條一籌撫卹被難民獠照水旱偏災例賑濟一重官守舊設永州府

理猺同知官署久圯請於江華永明兩邑交界處興建駐紮其較遠之寧遠新田藍山三縣猺戶改駐通判分理均改爲邊疆要缺一勤巡哨請於湖南省內地各標營撥兵百名增入錦田大橋等汛並令各猺境將備汛弁分季月巡哨一清叛產逆產入官招良猺佃種以田租十分之二賞猺總其餘設養濟院義倉義學歸理猺廳經管並禁民人入寨貿易一嚴保甲於衡永一帶民猺雜處之所飭牧令教佐率紳士按戶查明姓名年貌藝業載入門牌十家一總牌取具連環保結一察猺俗各山衝山寨向有猺總猺目猺老戶長請仍舊制加以懲勸如有倡邪逞兇等事責令據實報官如管教三年無故給與花紅酌賞外委頂帶一懲奸棍猺人愚拙易爲奸民欺壓嗣後責成理猺廳督同各縣嚴拏儻有延縱立即揭參一收火器猺俗向以鳥槍打牲應飭猺總禁止繳官並禁鐵鋪製造內地出產硝磺嚴禁私販一獎義烈逆猺滋事士民有捐資倡義剿賊陣亡及婦女被擄守節捐軀者地方官詳察請獎均下部議行時廣東連山猺匪亦叛總督李鴻賓先事失機軍屢挫得旨革職逮問命禧恩署兩廣總督禧恩以連州界接湖南請改驛遞由宜章至衡州較舊例爲近允之九月率大兵各紮隘口並設伏於火燒坪大掌

嶺兩排山口剿撫兼施軍寮馬箭八里岡各猪目乞降禧恩以首逆未獲分遣余步雲曾勝副將張必祿王錫朋普陀保等追捕親率大兵由後策應先後敗賊於冷水冲大吉坳大古坳陽公岐止關根黃瓜冲等處擒首逆鄧三盤文理及土匪李安達等俘馘甚衆盡燬其巢各排冲率衆投誠縛獻首逆猪山全境肅清奏入上嘉其辦理妥速賜白玉翎管搬指黃瓣荷包並下部優敘復諭曰禧恩前辦湖南江華猪匪督兵剿捕廣東竄入楚境逆猪甚爲得力及前往廣東於事閱半年未辦之猪甫抵連州一月卽能大加懲創以振國威各猪投誠乞降實爲迅速著賞戴三眼花翎伊本係鎮國將軍著封爲不入八分輔國公尋奏善後八條一連山綏猪同知應擇幹員照湖南理猪同知改爲邊疆要缺歲增養廉一三江扼要處責成副將率備弁隨時與連界之湖南廣西各專汛會哨分別賞罰一民猪貿易准其自立猪墟與民集互市其應徵猪糧令猪長率該戶赴廳交納一各猪有出山擾民者責令老千長交出如徇庇一體治罪一猪產祇准與猪人售賣不准民交涉違者田歸猪人不追原價一嚴禁猪人私藏鳥槍火藥一猪山居民無論已未報案一律調恤禁止報復及土匪搶掠酌裁原設羊六汛卡房一猪人大排

內設立耆老千長外每排再添耆練十人管領小冲耆戶統歸連山廳把總管帶差遣均下所司議行十月班師途次丁母憂諭曰該尙書勤勞王事不遑將母著卽到家守制十三年二月直隸各屬亢旱民食維艱疏請酌放義倉穀石以濟災黎允之四月恭理孝愼成皇后喪儀五月以議禮徵引違制下部嚴議革御前大臣戶部尙書總管內務府大臣旋授理藩院尙書七月御史趙敦詩劾禧恩生日收受司員送禮上令明白回奏旋據實覆奏事得直趙敦詩下部嚴議十四年七月充滿洲繙譯鄉試正考官十一月稽察右翼宗學內城七倉十五年三月署兵部尙書閏六月充文淵閣提舉閣事九月因相度龍泉峪萬年吉地形勢規模整齊堅固賞加太子太保銜十六年六月署禮部尙書管理太常寺鴻臚寺事務七月調兵部尙書仍署禮部尙書充崇文門監督九月兼署戶部尙書充武會試監射大臣十七年充滿洲繙譯鄉試正考官十八年正月管理藩院武備院事務四月充庶吉士散館閱卷大臣上以南苑爲肄武之地牲畜寥寥由於管理不善命偕御前大臣會議章程旋卽遵議入奏諭曰禧恩奏南苑各處分員管轄以專責成等事著載銓等再行詳加查議至禧恩此次蒞任未久從前管理多年朕屢加

面諭認真整頓自應力執積習乃漫不經心廢弛疏懈各實難辭禧恩著不必管理奉宸苑事務革去紫韁三眼花翎賞戴雙眼花翎仍交部議處尋奪太子太保銜兵部尙書復諭曰禧恩自道光初年卽經派令管理奉宸苑事務迨後緣事撤退旋復令其兼管是禧恩歷任最久宜如何實心任事嚴絕弊端茲據載銓等查出所屬各員挪移挂欠種種弊竇豈得諉爲不知乃竟一味因循毫無整頓辜恩喪良莫此爲甚本應重治其罪姑念事隔多年逐款追究亦屬煩瑣著從寬革去經筵講官領侍衛內大臣閱兵大臣管理藩院事務都統總管內務府大臣加恩以內閣學士降補仍管理圓明園八旗事務其餘各項差使著一併革退以示懲二十二年正月署盛京將軍五月授理藩院左侍郎仍署盛京將軍旋疏劾牛莊防守尉榮太委靡不振廣寧防守尉臺布辦事遲鈍請以佐領降補復先後拿獲匪徒梁恩甲白玉寶等得旨嘉獎八月戶部議准浙江官員捐辦米石運京禧恩以奉天雖非有漕省分願捐粟米者衆請飭部速議行知並從寬議敘以廣招徠九月授盛京將軍疏陳內地民人私越朝鮮邊界構舍墾田獲犯唐仁等治如律請嗣後每年春秋派員周查均如所請行時英人入犯浙江海口攻陷定海等

縣上命禮恩嚴防盛京海口因奏言英人船堅礮利不宜與水戰請以精兵三千駐省於熊岳鳳凰城廣寧義州各伏兵數百進攻堵截僻路小口收回漁商各船又於金州口岸可通陸路地方深挖濠溝排釘木椿散布蒺藜疏入土嘉其能中肯要辦理周妥二十三年二月遵議撤防善後十事一請移熊岳副都統協領駐金州移金州城守尉駐蓋州蓋州防守尉駐熊岳金州蓋州兵數不敷於熊岳兵九百五十名內均勻添撥統歸金州副都統兼轄一省城留兵二千宜分日演習各技按月演習陣式合操二次較閱馬步箭分別優劣並令沿海各城一律操演一每年春秋季演放八千斤至二千五百斤礮位各三出以免鏽滯一千五百斤以下者運赴各城及附近海口每月試演並於復州蓋房存放一請飭閩浙總督將補造戰船七隻迅卽押送備用並請嗣後補造照閩省遵工部議准規式丈尺木料辦理一省城閑散旗丁宜習鳥槍教以步伐並請緩撤金州旗勇遇有甲兵缺卽以此項挑補月給銀五錢一請各城添派佐領防禦一員會同民署委員及稅務衙門嚴查各島岫姦宄盤詰商船一各海口如有販運硝磺內地責成旗民地方官沿海協同山海關監督嚴查失察者參處拏獲者鼓勵一編查保甲不得

怠忽按季選幹員抽查如有一戶一名不實立即嚴參一各城牆垣宜令地方官籌款捐廉或勸捐修理並令各鄉堡於沿途大道自立窩鋪酌派夫丁巡查一請飭各邊門章京將邊壕邊柵一律挑樹深固不時帶兵分段巡緝疏入下部議奏旋議駁鄉堡自立窩鋪一條餘悉如所請四月奏定巡洋章程略言巡洋會哨必須三省聯爲一氣請於水師額設戰船十隻內每年派撥六隻每船兵六十名委員分三路出巡南至山東交界之城隍島以北東至朝鮮交界之岫巖大孤山西至直隸交界之錦州洋天橋廠各於該管衙門驗明照票以杜弊混其直隸山東哨船巡至交界一體驗照報明將軍如船不足雇商船配搭上遼其言五月以沿海各缺陞補窳礙請將寧海縣改爲金州海防同知鳳凰城通判改爲岫巖海防同知下所司議行八月拏獲鳳凰城中江卡倫砍木人犯孫振曲等三十九名又奏添設捕盜弁兵賊蹤斂戢得旨嘉獎十月以奉天歉收內倉米石不敷支放奏請將近省旗倉應徵地米撥歸內倉徵收又奏蠲緩牛莊等處錢糧皆如所請行二十四年八月劾錦州知府福忠便服遊山擅責無辜請褫職九月以盛京每年冬間進鮮已裁過半奏請酌減捕打冬圍兵丁三百名從之二十五年以病乞休

命開缺調理二十六年朝鮮國復以內地民人越界墾地構舍咨請嚴禁盛京將軍奕湘以聞上以禧恩在將軍任未能實心查辦削公爵降二等輔國將軍拔去雙眼花翎仍帶單眼花翎三十年八月命署馬蘭鎮總兵十一月署密雲副都統咸豐元年二月擢戶部右侍郎兼管錢法堂事務九月兼正紅旗漢軍副都統十月賜紫禁城騎馬旋轉左侍郎兼管三庫新舊營房事務十一月調鑲紅旗滿洲副都統二年正月陞戶部尚書兼鑲藍旗蒙古都統署吏部尚書四月署工部尚書充繙譯試正考官六月署理藩院尚書七月充鄉試監射大臣經筵講官八月復兼署工部尚書授鑲白旗總族長九月命以戶部尚書協辦大學士管理藩院事務充國史館正總裁十一月卒遺疏入諭曰協辦大學士戶部尚書宗室禧恩嘉慶年間由侍衛歷任內閣學士副都統侍郎總管內務府大臣復蒙皇考宣宗成皇帝加恩擢至都統尚書御前大臣賞用紫韁並因辦理楚粵軍務平定搖匪賞戴三眼花翎由鎮國將軍晉封不入八分輔國公加太子少保銜緣事降職朕卽位後念其平日辦事認真特授副都統侍郎旋即擢至都統尚書協辦大學士本月因病賞假方期調理就痊得資倚畀茲聞溘逝悼惜殊深著賞給陀羅經被

卽日派莊親王奕仁帶領侍衛十員前往奠醴加恩晉贈太子太保銜照協辦大學士例賜卹任內一切處分悉予開復應得卹典該衙門察例具奏伊子榮壽恆壽徵壽興壽彭壽明壽著俟百日孝滿後由該衙門帶領引見尋賜祭葬予諡文莊子榮壽襲二等輔國將軍恆壽頭等侍衛徵壽二等侍衛興壽彭壽三等侍衛弟裕恩由應封宗室於嘉慶四年賞戴花翎十一年賞頭品頂帶十四年封二等鎮國將軍授二等侍衛在乾清門行走二十二年擢內閣學士兼禮部侍郎銜二十三年二月兼正黃旗漢軍副都統十一月充崇文門副監督鑲黃旗總族長二十四年五月授右翼前鋒統領七月遷理藩院右侍郎署行在兵部侍郎九月調正黃旗滿洲副都統十月文穎館不戒於火裕恩以撲救迅速下部議敘二十五年三月復署行在兵部侍郎四月以前在巴克什營遺失行印事發裕恩坐失察命退出乾清門革侍郎前鋒統領副都統仍留鎮國將軍九月宣宗成皇帝御極加恩錄用獲咎人員裕恩與焉十月授鑲黃旗漢軍副都統道光元年五月復授理藩院右侍郎七月署鑲白旗護軍統領十月調工部右侍郎兼管錢法堂事務二年三月以失察司員法克精額等辦理壇廟工程收受官匠陋規朦混銷算降

一級留任六月調吏部右侍郎授右翼總兵十一月疏言滿洲蒙古漢軍八旗額設捕盜步軍校共四十員向無官馬應差查兩翼前鋒營八旗護軍營馬匹有餘擬請撤出四十四分給捕盜步軍校於差務實有裨益如所請行三年六月兼署上駟院事務八月奏直隸各州縣被水黃村等設廠煮賑查通州所屬馬駒橋一帶災黎全集距飯廠較遠應請於附近添設一廠俾便於就食允之九月調戶部左侍郎四年正月偕軍機大臣等遵議保送倉監督章程奏言花戶散法由監督約束不嚴監督僨事由堂官保送不慎請嗣後各衙門如欽天監太常寺鴻臚寺鑾儀衛所轄各員均有專司於倉務恐未習練毋庸開列外其餘仍照例於員外郎以下等官保送如有結實可靠之員准其奏留二年并予陞途以示鼓勵再倉場等官向例京察四員擬酌添一員每次滿漢各員遞相輪保以昭平允至倉監督因歲給養廉祇准支領半俸請仍給全俸俾資辦公其有通同舞弊及庸劣不職者令該侍郎隨時考覈奏請分別處治是之二月吉林將軍松筠奏瀋務疲憊請酌覈舊章辦理命裕恩會同軍機大臣議奏劄夫留山應令各攬頭舉素悉之人將姓名地段註冊給予腰牌按額交瀋次年更換之時責成押票官認真稽

察至所稱就地屯田以資入山口糧查開墾之初既多繁費且令創夫耕植兼顧爲難若另招貧民則防範難周益不免偷漏之弊應循舊章實力整頓如所議行六月兼署吏部左侍郎七月轉左侍郎署戶部右侍郎兼管錢法堂事務五年因病陳請開缺得旨裕恩著准其開缺安心調理不必限以時日俟痊愈後再行賞給差使六年正月署鑲黃旗漢軍副都統七月調正紅旗蒙古副都統九月授禮部右侍郎十一月充玉牒館副總裁國史館清文總校七年二月充八旗軍政大臣三月充八旗侍衛官員軍政大臣七月調鑲黃旗滿洲副都統八年七月命偕工部尙書穆彰阿恭送玉牒尊藏盛京並查勘三陵及各處應修工程十一月調吏部右侍郎充右翼監督九年二月署工部右侍郎兼管錢法堂事務七月奉天錦縣武生姜殿魁呈控知縣傅鍾瑑藉差科派命偕協辦大學士尙書富俊馳往查辦復以錦縣民人楊朝棟宗室景茂之女在蹕路籲控兩案一併審訊尋奏言知縣傅鍾瑑辦差係照舊章尙無勒派侵漁情事惟向商民借錢預備差費實屬辦理不善楊朝棟係因索欠未償砌詞妄控宗室景茂之女所控伊母魏佳氏呈控地畝防禦書銘責其違例不遣抱告輒行呵斥致令因忿自盡請將傅鍾瑑書

銘下部議處從之十一月授熱河都統十年三月疏言吉林雙城堡屯田京旗願往者少熱河願往者見有百餘戶且與錦州壤徑由口外前往較京旗尤便請遷駐以資養贍閏四月奏言都統衙門向設印房筆帖式滿洲蒙古各一員六年期滿願就武職者以本旗驍騎校補用查熱河駐防驍騎校滿洲十六員蒙古四員是蒙古筆帖式應補之缺較少擬請嗣後將年滿筆帖式於蒙古驍騎校四員內以第二缺補用俱下部議行七月奏熱河案件向設六房經承六名分項承辦歷任都統以刑名一項較繁而各項事務均少酌改爲四房設書吏四名惟未經奏明辦理茲查改設四房於公事不致貽誤應請將書吏覈減二名下部議行十月戶部捐納房書吏蔡繩祖假照案發裕恩前在戶部侍郎任內失察降四級留任先是古北口駐防八旗及提標城守各營每年需夏秋二季本色兵米八千石在古北口同知倉項下動支如有不敷於承德府州縣採買至是籌辦兵米裕恩奏言灤水產米無多除朝陽赤峯相距遙遠免其派買外應請派平泉州豐寧縣各二千石建昌縣一千石並倉內餘米支放其米價運腳銀兩在司庫撥給如所請行十一年三月以平泉州民人李自善被毆致斃一案知州覺羅爲光招解正兇

有非刑逼認情事奏請革職鞠實治如律並以承審司鄂克敦布等隨案請獎得旨允行先是上年十一月因骸疾請假一月至是八月因病奏請回旗調理允之二十六年卒

何汝霖

何汝霖江蘇江寧人嘉慶十八年拔貢十九年朝考一等授七品小京官分工部二十五年陞額外主事道光五年中式舉人九年充軍機章京十年以恭纂平定回疆方略告成議敘遇有主事缺出卽補旋補官十一年陞員外郎十二年遷郎中十四年正月京察一等四月俸滿截取記名以繁缺知府用尋充方略館提調十五年記名以御史用十六年正月京察復帶引見得旨遇有應陞之京堂缺出開列請旨其郎中任內京察一等著卽註銷九月陞內閣侍讀學士十八年擢太常寺少卿十九年七月遷大理寺少卿十月稽察左翼覺羅學十一月御史高枚奏參浙江學政李國杞任事蠹疏命汝霖偕吏部右侍郎恩桂往按之十二月奏言李國杞於附生陸敬冊貌兩歧暨陳殿詔等頂名冒考均無覺察請下部議處從之時御史蔡家珩奏淮揚一帶工所有姦民以小船竊撈隄根碎石並乘夜抽

取壩埽柴葦守隄兵丁通同一氣河員徇隱不究上命汝霖等回京便道查勘並
密查東南兩河各工料塚二十年二月偕恩桂奏姦民撈石抽柴屬實請飭下河
督嚴飭員弁稽查併究出南河東河各廳承辦料塚有虛短情弊請將各廳員交
部分別嚴議議處悉如所請是月回京以京察屆期例應補行引見諭曰大理寺
少卿何汝霖本日差竣回京召見著照舊供職毋庸帶領引見三月命在軍機大
臣上學習行走並賞三品頂帶旋擢宗人府府丞六月吏部以廣西截取知縣全
州學正鄭履和未將從前就教據實呈明率卽領咨赴部參奏汝霖遵旨偕戶部
尙書隆文查訊屬實奏革如例并以舉人揀選例未盡一請交部申定章程允之
二十一年陞都察院左副都御史二十二年五月擢兵部右侍郎十月調戶部右
侍郎兼管錢法堂事務賜紫禁城騎馬二十三年正月京察屆期上以汝霖夙夜
在公勤勞備至下部議敘五月偕軍機大臣等議覆睿親王仁壽請改宗室官學
章程疏言蒙養之功貴無間斷若將每日到學誦讀改爲每月月課二次恐致一
暴十寒似非國家篤厚宗支樂育人才之意惟教習等或督課不嚴虛應故事應
責成查學大臣酌定功課不時往查遇有曠廢分別懲辦上是其言六月命偕協

辦大學士敬徵往勘南河大行至山東適河南中河廳九堡漫口命折回東河查勘時兩河連年漫溢制用浩繁部議東河暫開捐例御史雷以誠請兼納糧石料物按銀折算以濟工需八月汝霖等遵旨會議奏言向來河工設廠購料剋期足額若令捐生交納既不如交銀之便且市價靡常折算無準事屬難行至所稱納米麥雜糧自係爲儲備民食起見惟運赴工次及在附近州縣存放易滋流弊應請於河南省城交納存倉由藩司查覈歸入現行捐輸款內奏請議敘得旨允行十二月兼署禮部左侍郎偕軍機大臣等會議給事中和豐條陳推廣覆試奏請於貢院舉行以歸簡易各省新中舉人定於會試年二月十五日入場覆試閱卷大臣分擬等第進呈後交磨勘官及覆勘大臣覈對原中各卷文理筆跡其道途遙遠逾期始到者歸入順天一體補行覆試如三科覆試未到永遠不准會試亦不准赴部截取銓選詔如所議著爲令二十四年調戶部左侍郎兼管三庫事務二十五年四月陞兵部尙書十月偕軍機大臣等遵議御史張修育請賞給老民頂帶年八十以上者給九品頂帶九十以上者八品頂帶百歲以上者七品頂帶百二十歲以上者六品頂帶其百歲以外者除給頂帶外仍給建坊銀兩允之

二十六年正月以祖母丁氏年九十歲遵旨奏聞諭曰兵部尙書何汝霖之母丁氏五世同堂親見七代承恩祿養洵爲盛世嘉祥覽奏之餘實深欣悅頒御書扁額福壽字及如意文綺等件賜之五月丁母憂二十八年以江蘇水災捐銀備賑下部優敘二十九年八月服闋九月命以一品銜署禮部左侍郎仍在軍機大臣上行走十月署戶部尙書三十年授禮部尙書咸豐二年正月京察屆期下部議敘旋因病奏請開缺得旨賞假一月假滿以骸疾復行陳請諭曰本日禮部尙書何汝霖面陳骸疾未痊懇請開缺朕察其精神未遽衰頹惟起跪稍形竭蹶因思軍機事務較繁若仍令入值轉非所以示體恤著加恩毋庸在軍機大臣上行走仍在禮部辦事以示朕篤眷耆臣至意十二月卒遺疏入諭曰禮部尙書何汝霖持躬謹愨辦事實心由部曹充軍機章京蒙皇考宣宗成皇帝疊加簡任以大理寺少卿贊襄樞務洊擢正卿服闋回京仍在軍機大臣上行走朕御極後由署禮部侍郎授禮部尙書見其醇謹老成優加委任前因骸疾懇請開缺諭令毋庸入值仍在禮部辦事茲因患病賞假調理方冀速痊常資倚畀遽聞溘逝軫惜殊深著賞給陀羅經被派恭親王奕訢帶領侍衛十員卽日前往奠醴加恩晉贈太子

太保銜照尙書例賜卹任內一切處分悉予開復應得卹典該衙門查例具奏伊長孫何承禧著賞給舉人准其一體會試用示朕篤眷耆臣至意尋賜祭葬予諡恪慎子兆瀛浙江杭嘉湖道孫承禧內閣侍讀

花沙納

花沙納烏米氏蒙古正黃旗人道光十二年進士改翰林院庶吉士十三年四月散館授編修七月充日講起居注官八月陞侍講十一月轉侍讀十四年遷右春坊右庶子十五年充雲南鄉試正考官十六年擢國子監祭酒二十三年閏七月署都察院左副都御史八月充順天鄉試副考官九月遷通政使司通政使十一月陞都察院左副都御史二十四年二月擢盛京刑部侍郎尋調禮部右侍郎七月署右翼總兵八月命覆覈朝審以擬緩絞犯閤四情節未協疏言向來直省秋審人犯由各督撫分別情實緩決刑部覆加覈議其改緩爲實改實爲緩者例有處分惟朝審人犯但由刑部分別情實緩決不加覆議立法尙未周備嗣後覆覈朝審有部議未協應奏明請旨以昭慎重如所議行尋授鑲紅旗漢軍副都統十月調工部右侍郎兼管錢法堂事務授總管內務府大臣二十五年二月調戶部

右侍郎兼管錢法堂事務四月兼正黃旗滿洲副都統二十六年二月署正藍旗滿洲副都統三月署鑲黃旗護軍統領十月疏言東南各省歲額漕四百餘萬石近來徵收未能足額本年抵通米數較全漕短一百萬石亟宜早爲籌畫擬請撥銀三十萬兩存天津道庫照本年收買商米之案飭下兩江總督江蘇巡撫估計提存銀兩妥勸各商採辦粳米由海運津官爲收買並照成案給與執照所過關津免其納稅如所請行十一月直隸總督訥爾經額奏匪徒影射流民請分別懲辦花沙納以匪徒假捏固應懲辦而實在災黎仍以撫綏爲要偶有偏災尤當覈實稽察勿令一夫失所聞浙總督劉韻珂奏臺灣生番輸誠內附獻納各社輿圖歸官開墾花沙納奏番情果否悅服地勢有無險阻尙須周歷詳勘通盤籌畫既不可拂遠人向慕之誠尤不可疏內地防維之計上躋之二十七年正月福州將軍璧昌奏招商運米赴津上命花沙納前往督地方官收買運通三月疏陳積儲期於經久杜弊卽以卹商天津掣驗米色僅收十分之四若挑選過甚該商等所餘之米無從出售於招商捐米事宜皆有望礙見將黑色之米一百八石駁斥不收應找價銀當堂給發不敢以不顧全局之事上煩聖心亦不敢以不堪食用之

米濫行收買上嘉納之八月授左翼總兵十月倉場侍郎德誠等奏見放商米與原樣不符命花沙納前往查驗尋奏存倉商米甫及一年何至黴暗如此之速且添堆浮面與原封米樣不符顯有影射於前掩飾於後情弊請將花戶人等交刑部嚴辦二十八年二月調吏部左侍郎十二月疏參南營參將鄧朝樑不勝繁劇請以遊擊降補從之三十年二月管右翼官學三月充會試副考官擢都察院左都御史七月授鑲藍旗漢軍都統九月充武會試監射大臣十月署正白旗漢軍都統十一月署正藍旗蒙古都統賜紫禁城騎馬咸豐元年二月署鑲白旗漢軍都統五月署鑲藍旗蒙古都統八月署理藩院尙書正藍旗滿洲都統閏八月充點驗軍器大臣署鑲紅旗滿洲都統充稽察七倉大臣十二月充經筵講官二年正月署鑲黃旗蒙古都統步軍統領三月署正紅旗蒙古都統五月署翰林院掌院學士七月署鑲紅旗蒙古都統九月奏請停捐納舉人生員成議酌行鈔法略言捐例之開本屬弊政自西漢作俑於鼂錯歷代多踵行之若舉人生員則自有科目以來無人議及今乃並此捐之胥天下而出於利途貽人口實駭人聽聞況舉人一虛名耳無廉俸無官階報效五千金博此虛名以之捐京外官何求不得

何必出此重貲自廁於非官非士之列至文武生員捐者尤少爲今之計莫如酌行鈔法惟查前代行鈔皆不能無弊蓋鈔用紙質易於作僞弊一朝令夕改民不信從弊二官項不收自相矛盾弊三禁銀禁銅抑勒滋擾弊四積年添造壅滯難行弊五不議更換昏爛輒廢弊六謹擬造鈔之法一鈔質以綾爲之連用二印誌書跡於其中則真僞易辨一鈔式織成按千字文編號以免溷淆一鈔綾用正黃色印花用上等硃砂印板用精銅鑄就一銀鈔數目自一兩五兩十兩至五十兩分四等每張計費銀五錢一寶鈔之費一千七百張共需銀八百五十兩卽可當萬金使用一鈔分四等鈔式則一一鈔皆準銀較準錢爲簡便一鈔銀擬造滿一萬萬兩爲止一造鈔除五六十年後奏請更換外或大工大役估計所需必須添造工竣停止一法律宜嚴治僞造者寬待誤收者一造鈔伊始先將行鈔條例頒示天下將來帑項極充毋庸再用准其抵交入庫其行鈔之法一請銀錢與鈔併用一請設督理鈔局官一外省用項由鈔局會同戶部酌給銀半鈔半或搭放寶鈔二成以次遞增半鈔而止一順天則發府尹盛京則發戶部西北關外等處則發將軍一內自京城外至各省督撫州縣鄉市各錢店一律暢行不准阻撓一民

間交易銀鈔聽其自便惟交官銀兩必須銀鈔各半一鈔宜上下通行凡完糧納稅捐項統用銀鈔各半一凡以鈔完糧納官者概免傾鎔火耗一實鈔既行不必禁銀禁銅徒滋紛擾一行鈔五年後內外官廉俸及兵餉各請量加初時全給以鈔久則銀鈔兼支一凡商民積欠及災區緩徵帶徵各款未盡豁除者鈔行概從蠲免一各省庫虧許將存庫之鈔搭解扣銀留庫陸續補完一庫虧既補各免攤賠自後互相糾察咸與維新於吏治大有關係一捐例本不得已而開行鈔則捐例可以永閉關繫尤爲匪輕其換鈔之法一鈔法之關鍵在未議行先議換民間昏暗之鈔准其完糧納稅由州縣作爲正項陸續收解一換一新鈔必須繳一舊鈔解部銷燬以杜偷抽之弊一換給新鈔必按字號發給不至散漫無稽一換鈔惟京城以內許赴局呈換外省則不令赴公門驗換免致吏役需索一換鈔俱照原數以便覈對一鈔式俱照從前惟簡明條例另換至行鈔之利更有可詳言者天下貨利皆有盡一金抵一金之用惟鈔之利無盡造十萬則十萬造百萬則百萬秉造化之錘鑪利一利權收之於上布之於下尊朝廷之體統利二金銀不便攜帶盜賊能望氣測塵鈔則可納諸懷袖利三民間錢票會票每苦錢店關歇鈔

則永遠通行利四鈔有一定銀數無成色高下之分商賈不得任意低昂利五洋錢行入內地閩廣江浙貪其便用行鈔則不禁自廢利六度支既裕則蠲逋賦加俸祿增工食免官吏困迫之虞利七財用既足則興水利務開墾厚積儲利八庫帑常盈則添海防增兵餉減關稅利九捐例永閉清仕途之壅積可以澄敝官方利十攤款悉除免州縣之分賠可以成就廉吏利十一水旱偏災河工軍需不假捐輸可杜抑勒利十二用度常充凡河漕鹽務積弊之當釐剔邊境衝途城池之當修濬可次第籌及利十三穀賤傷農之時出鈔收買則市價常均倉儲益裕私鹽充斥之區出鈔收積則化私爲官化梟爲良凡物貨壅滯皆得以此酌盈劑虛利十四獨操天下之利權無所復事於聚斂一切予民皆可從厚取民皆可從薄而尤莫要於急停捐納舉人生員成議俾目前不致坐失士心於政體大有裨益疏入下部議行十月以捐備軍餉命交軍機處存記十一月圓丘大祀花沙納以前引禮節爛熟賞戴花翎三年正月授步軍統領二月會議行鈔章程略云理財之道固貴相時濟用尤宜慎始慮終請定簡明章程於京師先爲行用俟流通各省一律遵辦不必襲用鈔名卽稱爲票使商民日用相安如所議行五月粵匪竄

擾河南逼近畿輔上以京師爲根本重地防範稽察尤關緊要命花沙納專辦京城各旗營巡防事宜九月陞工部尙書十二月以疊次捐備軍餉下部優敘四年正月署翰林院掌院學士八月充崇文門監督十月調吏部尙書充實錄館總裁五年四月以山東馮官屯賊首李開芳等蕩平北路肅清下部優敘八月充順天鄉試副考官十月充武闈監射大臣六年正月充經筵講官三月署正白旗滿洲都統兼署戶部尙書七年宣宗成皇帝實錄告成加二級八年四月命偕大學士桂良馳赴天津海口查辦事件六月復命攜帶欽差關防前赴江蘇會同巡撫何桂清妥商稅則事宜旋以英船退出天津海口奏獎天津官紳各員從之十二月授內大臣九年六月回京自道光二十四年至是年歷充宗室舉人覆試順天鄉試覆試各省舉人覆試閱卷大臣考試漢教習謄錄學正學錄中書閱卷大臣殿試讀卷官拔貢朝考進士朝考閱卷大臣庶吉士散館考試試差閱卷大臣大考翰詹閱卷大臣十二月卒遺疏入諭曰吏部尙書花沙納人品醇粹學問優長由翰林蒙皇考宣宗成皇帝疊加簡任洊擢卿貳朕御極以後晉秩正卿勤慎宣勞克盡厥職方以年力正強長資倚畀茲聞溘逝悼惜殊深著賞給陀羅經被派員

勒載治帶領侍衛十員卽往奠醑並著賞銀三百兩治喪照尙書例賜卹任內一切處分悉予開復應得卹典該衙門察例具奏伊子兵部員外郎希凱著俟百日孝滿後由該旗帶領引見用示朕篤念蓋臣至意尋賜祭葬予諡文定子希凱內閣侍讀學士

徐澤醇

徐澤醇漢軍正藍旗人嘉慶二十五年進士以主事用分吏部道光十二年補官十三年陞員外郎十七年陞郎中十九年授四川重慶府知府二十一年陞山西河東道二十二年調江南河庫道二十三年以搶護南河險工及捐辦江北礮局均下部議敘二十五年陞湖南按察使二十七年陞山東布政使二十八年六月擢巡撫先是山東捕務廢弛盜賊公行經前任巡撫張澧中嚴定緝捕章程及失察諱匿各員處分至是澤醇奏言緝盜之要固宜覈屬吏獲犯多寡以示勸懲尤貴嚴拏兇渠使羣匪斂迹方爲實效臣到任後訪查各屬地方雖較前稍形安謐而在逃要犯尙未悉擒惟有督飭文武認真搜捕務將著名要匪盡數弋獲不准以僅緝夥匪塞責上聽其言七月奏東省洋面疊遭劫掠水師將弁玩忽不前請

將遊擊陳振疆等革職仍責令隨營協捕如所請行又奏沂州府屬有淮徐匪徒肆掠營汛兜捕互有殺傷地方文武據實稟報不敢蹈從前諱匿惡習請暫緩參處勒限購捕以贖前愆允之八月奏緝獲著名匪犯過半並續獲捻幅各匪上嘉勉之時山東洋面屢有閩廣匪船闖入劫掠十月澤醇以閱伍順赴登州親勘奏言東洋三千餘里惟登州之蓬萊福山文登榮成四縣爲全洋扼要盜案最多水師戰船重笨非風不行雇用商船旁無遮護又不能多載礮位請添製捕盜快船如奉天蓋州紅頭小鳥船式水師前後兩營南北東三汛共需船二十五隻合計造費及添製器械需銀三萬五千兩請於司庫見存廟工生息項下借動備用下部議行又以東省鹽務爲准私灌浸運銷失時請免考覈州縣處分從之復奏鹽務參商積引益多請變通舊制十二月命大學士耆英戶部右侍郎朱鳳標前往山東偕澤醇查辦嗣會籌變通章程奏言東省鹽務受弊已深其引地票地或輾轉出租或認商抵欠或商逃引懸無人行運或子店關閉難禁食私且綱總之易滋盤踞浮費之貽誤正供積引之以舊混新認商之以此冒彼種種情形甚於他省兩月以來確查遠近引地綜覈古今成法如課歸地丁攤徵係雍正七年以後

成案東省惟近海之安邱等十八州縣行之此外山河間阻西南各引地距場千有餘里販運不前若按畝攤徵則賦有加增而民多淡食設遇偏災不能不隨正供蠲緩至就場收稅其法始於唐臣劉晏近惟淮北河湖水運節節可通票鹽設局驗貨參用其意東省則水陸俱艱若行票招商恐致無人承領當此力求變通期於可久惟有先納課而急惟正之供參官運而無虛懸之引成本已減積欠可清加斤則商有餘貨減價則民多沾利疏入下部議行二十九年三月奏言東省地廣賦輕州縣舊有經費足資辦公近來銀價增昂州縣歲入稍絀不思量入爲出相習奢靡此歷年倉庫虧缺所由起也旣已虧挪不得不多方掩飾而其大端實在流攤列抵假詳公事爲名恣意開銷詳稟立案入於交代分任流攤經一官必增一二攤案而應攤銀兩並不照數解存司庫且有本無虧項而藉款攤抵以飽私囊者更有前任無虧而後任轉爲捏飾朦混者前撫臣張澧中議請攤賠各款照案攤追實未料及攤案之弊至於此極今澈底清查嚴飭各屬將歷年攤款據實報出一州一邑竟有一年而爲前任攤銀七八千兩者攤數旣鉅終屬虛懸若再迴護前議不將攤款截止仍令後任照案攤抵必至輾轉糾纏庫款永歸

無著見辦清查總以歸補舊虧杜絕新虧爲提綱緊要應請將見在各屬報出流攤各案係虛款列抵者盡行剔除公同籌款彌補一面就見在各員照數分別著追查通省州縣地丁項下有坐支官俸役食多係支銀用錢銀價倍昔用項實有贏餘按各屬年額坐支多寡覈提數成飭令隨同地丁批解如有延欠照地丁未完例參處其原抵各員除病故廢斥無庸議外見任候補及丁艱告病並本員雖有事故子孫尙有官職各員無論已未離東均各按其見抵虧數著落分別追賠萬兩以上限五年萬兩以下限三年依限解還如該員有應追正雜等款俟前款完繳再將攤案追賠之款起限接追總期十餘年內將前項攤款清結此後不准再有流攤名目如敢蹈習前弊將朦混捏報之州縣濫行批准之上司均照侵盜錢糧律治罪下部議行時議裁汰冗員澤醇請裁山東泉河通判河南陽河通判允之閏四月兼署河東河道總督七月遵議酌減漕務浮費奏言東省兌漕幫費名目不一惟折幫及代買二項爲全漕之蠹幫丁之挾持州縣州縣之累及花戶皆由於此請將折幫代買及各項雜費盡行禁革一律定爲津貼公費按各州縣兌漕給幫之數如每石二三錢者仍舊在四錢以上者卽以四錢爲限若逾此數

計贓治罪惟花戶兌糧遲速不能如期州縣距水次遠近不等兌限迫促每苦徵運不及爲幫丁所挾制應請酌量水次買兌總期不誤正供不准幫丁藉詞索費隨時委員秉公查驗分別參處又漕糧項下尙有撥運青州駐防滿營兵米由青州府兌收支放及隨漕同徵之德常二倉本色米石由糧道兌收支銷向以米出於漕其弊亦與漕同此項浮費亟應節刪查兵米雖例定本色實則私交折價其勒折浮費之由總緣收兌衙門以州縣陸運耗累爲詞乘機要挾應請嚴申禁令仍交本色惟路程稍遠州縣始准通融酌交折價其價以青德兩府州當時糧價爲斷不准私毫加增所需津貼之費無論本折照見定幫丁公費再減一半每石不得過二錢似此明定章程兌收衙門無由藉詞浮索則州縣取之於民者亦應酌減如再藉口費重苛取病民立卽從嚴參辦又言州縣虧缺之由一因糧價昂貴一因公事增劇意外之用有增無減一因流攤輾轉糾纏愈趨愈重一因漕糧兵米勒索浮費尤爲有漕州縣切膚之害一因習尙奢靡牧令身家私用踵事增華五者相因倉庫錢糧遂不可問今欲彌補舊欠杜絕新虧非嚴提錢糧以裕庫儲裁減浮費以恤州縣尙節儉以輓頽風無以清其源而遏其流臣旣將通省

攤款裁止又將各屬兌漕浮費盡行裁減其他無名耗蠹有不可以數計者臣惟有儉以率屬寬以卹下庶幾彌補舊欠杜絕新虧嚴法懲創各牧令無從藉口矣至各屬正耗新舊錢糧見在嚴覈催提計增收新賦與彌補舊虧司庫歲可多入銀五六十萬兩日計不足月計有餘數年之後庫儲可期充裕上嘉納之九月擢四川總督奏言山東鹽務疲累已久上年會籌新章行之半載積弊頓除各口懸引或歸官辦或令商認俱已領運有人本年額引四十萬五百道額票十四萬餘道秋季未終運銷已及十分之九徵完正課加價彌補積欠等款共銀二十九萬五千餘兩十一月間引課即可埽數全完以後慎守新章諸從節儉可復年清年款舊制得旨褒獎下部議敘三十年三月兼署成都將軍六月奏言古人事君以實而以才濟之所以事無不濟而才爲不可及今人雖無其才而矢以實心亦可補才之不足盡一分實心卽得一分實效若無實心而自恃其才適以濟其欺詐之惡方今急務用人之外卽重理財國家經費有常以各省地丁鹽課關稅約計量入爲出總有贏餘卽有偏災歉歲亦不過減十之一二近來帑項動形支絀議者不以年歲荒歉爲詞卽以用項繁多藉口乾隆年間東南兩河及各項工程所

用倍於今日而庫款豐盈今則事事從儉益形不足理財之政不講於錢糧課稅不能認真祇奉行故事耳卽如地丁一項每年循例詳咨而朦蔽卽伏於其中請將各州縣地丁稅課一年清查一次分別已完未完開單具奏則州縣自不能任意侵欺而帑項日見充裕疏入下所司議行十月奏言川省產鹽之地井竈紛沓梟徒便於販私關隘疏懈鹽船每多夾帶或一引而行數引之鹽或此商而占彼商之岸且有稽留殘引影射重照覓代正引祇圖收息拖欠稅羨地方官懈於緝捕致令私充引滯以及奸胥蠹役需索百端實於鹽務大有關繫見經明定章程稽察井竈以清私販之源鈐束關隘以除夾帶之弊酌加斤數以紓商力剖分地界以清黔岸勒限繳殘不使匿留作弊嚴緝私販毋令充塞鱗網取課稅於代商俾免侵挪之慮裁靡費於胥役以杜需索之門仍當督飭各屬實力遵行以期鹽法肅清永無延欠下部議行咸豐元年奏屏山縣屢遭夷患前因剿辦不能得力道光十九年改而辦防設立萬全營乃十餘年來擾害仍不復息時或擾及毗連之健爲樂山邊界訪查其故實因幅員遼闊夷匪處處可入原設兵練不敷防堵調取外營又緩不濟急歷稽舊案每屆秋收輒有夷匪出搶之事曾奏明於峨邊

鎮遠普安左右安阜及馬邊各營酌抽兵練三百餘名作爲游兵相機堵擊而峨邊各營亦夷疆重地未便久出不歸請於縣境另設專營駐都司一員千總外委額外外委共八員兵丁六百名就近分派堵擊不必別調外兵所需都司一員擬將建武營都司移駐屏山歸馬邊協管轄作爲三年邊俸題調要缺所遺建武營應改爲守備缺以赤水營守備移駐赤水營改爲赤水汛由永寧營撥千總一員往駐至修築碉堡團練丁壯尤爲防夷要務將來設營建署製造礮位一切用項均由外籌款辦理二年三月疏陳屏山建營章程一移置營汛以專責成一抽撥弁兵以資防守一修建碉堡以靖邊患一勤習武備以實操防一明定甄劾以示勸懲一查拏漢奸以杜勾結均下部議行尋以捐備軍需賞戴花翎十一月召來京十二月授禮部尙書賜紫禁城騎馬三年三月孝和睿皇后奉安禮成加二級旋充會試正考官四月充殿試讀卷官八月署戶部尙書十月充考試漢中書閱卷大臣十二月議覆署禮部左侍郎宋晉請明定糧臺減給薪水章程奏言糧臺冒濫之弊積習相沿查定例軍營文武官員各按品級大小支給俸廉鹽糧馬乾馱折跟役等項從無酌給薪水名目而各路糧臺竟敢明目張膽論品級之崇卑

定供支之多寡奏銷時任意攤入無可稽覈侵耗隱匿百弊叢生應請嚴申例禁通飭各路糧臺如敢仍稱薪水名目任意浮支予者受者均按冒濫軍需律治罪仍責令加倍賠繳抵充軍餉以儆侵貪所請量減之處應無庸議從之六年九月充武殿試讀卷官十二月議覆翰林院修撰張之萬奏考試生童經古請將孝經出題作論疏言孝經一書廣大悉備至德要道皆本於此孔子言志在春秋行在孝經誠以孝爲百行之原我朝孝治覃敷列聖相承昌明經學皇上道隆紹述特命刊刻繙譯孝經闡天經地義之微以端物則民彝之本士子涵濡教澤童蒙肄業自當身體力行若於考試經古以孝經性理一併命題則誦習切於身心化導先於庠序於詞章之中寓性情之實因文見行誠正本清源之學於培養人才轉移風化大有裨益應如所請行八年八月命恭送宣宗成皇帝實錄尊藏盛京十月差旋因病乞假十一月卒遺疏入諭曰禮部尙書徐澤醇人品端謹辦事老成由進士籤分吏部蒙皇考宣宗成皇帝恩遇簡放外任洊擢封疆朕念其宣力有年特以禮部尙書內召服官中外典試禮闈均能勤慎宣勞克稱厥職茲以出差盛京感受微疾甫經兩次賞假方冀調理速痊遽聞溘逝軫念殊深著賞給陀羅

經被派貝子奕劻帶領侍衛十員卽日前往奠醊加恩照尙書例賜卹任內一切處分悉予開復應得卹典該衙門查例具奏伊子候選知府見任山東同知徐彬著服闋後以山東知府補用伊孫監生徐承烜著賞給舉人一體會試以示朕篤念耆臣至意尋賜祭葬予諡恭勤子彬山東補用知府桐進士吏部左侍郎孫承烜江蘇同知承煜戶部主事承熾戶部員外郎承焯舉人兵部主事戶部員外郎

宗室恩華

宗室恩華鑲藍旗人鄭愼親王烏爾恭阿子道光十三年封三等輔國將軍授散秩大臣十六年命在內大臣上行走十七年命在乾清門行走十八年授正黃旗蒙古副都統十九年調正藍旗滿洲副都統二十年正月管理上虞備用處事務三月授內閣學士兼禮部侍郎銜八月上閱侍衛騎射恩華以箭射無準罷副都統二十一年三月授鑲藍旗蒙古副都統八月陞理藩院右侍郎九月署鑲白旗護軍統領十一月調正紅旗滿洲副都統二十二年轉左侍郎二十三年銀庫虧短案發恩華以前充查庫大臣革職留任尋於限內將罰賠銀兩全完得旨開復二十四年四月充滿洲繙譯會試副考官七月署正黃旗漢軍副都統二十五年

五月稽察左翼宗學六月管理幼官學事務二十六年二月丁父憂百日孝滿授
鑲白旗護軍統領十二月管理唐古特學事務二十七年四月充奏事處領班十
一月兼鑾儀衛鑾儀使十二月調正黃旗護軍統領二十八年調工部左侍郎管
理火藥局事以玉牒告成命恭送尊藏盛京二十九年正月調鑲黃旗護軍統領
二月署鑲黃旗滿洲副都統管理嚮導處事務閏四月充左翼監督九月充滿洲
繙譯鄉試正考官三十年三月調兵部左侍郎五月授鑲紅旗總族長十二月充
經筵講官咸豐元年六月署左翼前鋒統領八月署吏部左侍郎九月署右翼前
鋒統領二年正月授總管內務府大臣署理上駟院事務五月倉場侍郎朱崢遵
旨覆奏海運米石短絀情形與戶部前奏不符命偕工部侍郎彭蘊章往按之尋
以朱崢等辦理未能合宜奏覆並請嗣後責成坐糧廳及大通橋監督認真查驗
迅速轉運如有潮溼短絀情弊卽行嚴究懲辦允之十二月以吉林將軍固慶與
副都統琦忠互相參奏命偕兵部左侍郎趙光前往查辦尋奏固慶於所委佐領
依祿查拏私確聽受多贓畏罪自陳仍復回護派審實屬意存消彌琦忠於固慶
派甲及揀筆帖式不遵定制一同畫行事隔數月始行訐參實屬徇隱於前攻訐

於後請將固慶琦忠俱下部嚴議允行三年正月署吉林將軍偕趙光奏言近來吉林各屬匪徒持仗火器犯案甚多經刑部申明私硝禁例查打牲烏拉地方四百餘里無業遊民藉集硝土爲生擔負售賣向無例禁乾隆年間有硝達硝戶名目嘉慶初年以該處採辦貢品差務繁多將硝達硝戶奏裁歸鋪客採買其阿拉楚克三姓等城每年亦如此辦理嗣後若概行禁止不惟旗民生計有妨卽官用火藥亦多支絀若不示以限制恐匪徒執持火器藉端滋事又不可不防其漸應請旨飭交吉林將軍及打牲烏拉總管體察情形妥議章程或援照舊案仍編硝達硝戶以專責成或設官商鋪戶以便考覈總期官藥有著私販禁絕下所司議行尋回京二月授左翼前鋒統領三月陞理藩院尙書兼鑲紅旗漢軍都統時粵匪由湖北蔽江東竄命恩華率吉林黑龍江官兵赴江南淮徐一帶防堵瀕行賞銀兩五月賊由安徽犯河南懷慶等府恩華遵旨赴援八月懷慶解圍諭曰恩華幫辦軍務力籌攻剿謀勇兼施洵堪嘉尙著賞穿黃馬褂九月賊由懷慶竄擾山西境由垣曲渡河陷平陽府折而東出臨洛關入直隸界恩華追剿遷延諭曰恩華經朕特派帶兵剿賊並令幫辦軍務自應奮勇出力乃自逆匪潰竄該都統僅

事尾追並未與賊一戰經欽差大臣勝保屢次咨催仍復任意遲延辜恩溺職大負委任恩華著卽革職拏問交刑部會同宗人府審訊按律治罪旋因勝保及參贊大臣科爾沁郡王僧格林沁先後奏請留營效力允之四年卒於軍諭曰恩華本係軍營獲罪之員惟念伊父鄭愼親王烏爾恭阿由乾隆年間襲爵人甚樸實辦事勤謹該革員前在乾清門當差有年尙無貽誤著加恩追賞六品頂帶子壽善嘉善封奉國將軍

黃爵滋

黃爵滋江西宜黃人道光三年進士改翰林院庶吉士六年散館授編修八年充江南鄉試副考官十三年三月充會試同考官閏九月轉福建道監察御史十月稽察銀庫十三年二月以銀庫書役人數過多偕御史扎克三奏請裁併庫丁親故子姪不得濫充額缺八旗兵餉及各衙門支款繁多均按筭付總數彈兌由承領官分給並嚴禁銀號影射姦徒勾串之弊下所司議行七月刑部議定金銀出洋照私運米穀出洋例治罪爵滋以內地有仿鑄洋銀之弊奏請併禁出洋洋銀百枚照紋銀百兩科罪其仿鑄洋銀者照私鑄銅錢例科罪下部議行尋轉掌陝

西道監察御史九月遷兵科給事中十月以本年武會試考官置雙好中單好爵滋充監試未經參劾降一級留任十一月奏銀庫收捐易滋畸重畸輕之弊請嚴定章程永杜弊端下部議行又奏湖北連年被水江漢隄防請改民修爲官修嚴行考課以示勸懲並豫講防險之法多開支河以洩水勢十四年三月奏請別除州縣常平義社等倉積弊均下所司議行四月奏言賞罰出於是非是非出於名實有名無實者天下之大患也然及今而綜覈之猶易易耳學校常經也而以絕今之邪教則尤切保甲良法也而以靖今之會匪則尤宜水利農桑之本修水利以除水患則災黎復積儲地方之命廣積儲以備賑施則荒歲裕兵嚴校閱使領兵者悉能治兵則武有備海嚴防禁使緝姦者務能去姦則夷無患官材者所以共治天下者也使奉職者均能盡職則人存政舉上躋其言命下各省大吏實力整頓認真查辦五月轉工科掌印給事中十一月巡視南城十五年三月充會試同考官七月奏劾四川布政使李羲文性情乖謬遇事把持順慶府知府金齊賢阿年力衰頹官聲狼籍下成都將軍隆文等按之金齊賢阿等勒休褫職有差八月擢鴻臚寺卿諭曰科道中黃爵滋等平日遇事敢言是以擢用京卿風勵言官

卽是廣開忠諫之路嗣後務當屏除私見力矢公忠隨時進言以資採納九月奏陳察天道廣賢路豫備將材控制匪民整飭京城營衛申嚴外夷防禁六事疏入得旨飭京營嚴夷禁如所請行十六年正月奏陳漕河積弊五條一官弁推諉匪徒混冒一需索陋規貽誤限期一官弁兵夫玩誤廢弛一劣幕把持浮估冒開一匿報淤蕩屯留匪類俱請嚴行查禁下軍機大臣議行惟奏請復設巡視御史分道稽察一條寢之四月奏請飭各督撫嚴查州縣延擱命盜案件據實參辦五月奏請查辦姦徒運米出城接應回漕又疊請嚴杜回漕船剝船各弊俱允之十七年七月充山東鄉試正考官十月稽察右翼宗學十八年疏請塞漏卮以培國本略言近年銀價遞增度支漸絀非耗銀於內地實漏銀於外洋蓋自鴉片流入中國爲害日深道光三年以前每歲漏銀數百萬兩其初不過紈袴子弟習爲浮靡尙知斂戢嗣後上自官紳下至優伶隨在吸食置買煙具爲市日中故外洋來煙漸多另有躉船載煙不進虎門海口停泊零丁洋中之老萬山大嶼山等處附近奸商勾通巡海兵弁用扒龍快蟹等船運銀出洋運煙入口故自道光三年至十一年歲漏銀一千七八百萬兩十一年至十四年歲漏銀二千餘萬兩自十四年

至今漸漏至三千萬兩之多此外福建江浙天津山東各海口合之亦數千萬兩耗銀之多由於販煙之盛販煙之盛由於吸煙之衆今欲洋煙之不來必先加重吸煙之罪請嚴旨飭諭予以一年期限若一年後仍行吸食是不奉法之亂民卽寘之重刑罪以死論臣查余文儀臺灣志云咬啣吧本輕捷善鬪紅毛人製鴉片誘食之遂羸弱受制其國竟爲所據紅毛人有自食者繫其人竿上以礮擊之入海故其國祇造煙不食煙又聞洋煙到廣由孟買經安南邊境初誘安南人食之安南人覺其謀立卽示禁凡食者死不赦夫以外夷之力尙能令行禁止況我皇上雷霆之威雖愚頑之沈溺旣久自足以發瞶振聾伏請飭各督撫嚴切曉諭廣傳戒煙藥方各府州縣清查保甲豫先曉諭居民一年後取具五家鄰右互結仍有犯者准令舉發給予優獎儻有容隱照例治罪其通都大邑往來客商責成各鋪店儻敢容留窩藏匪類例治罪見任文武大小各官如逾限吸食照常人加等除本犯官治罪外其子孫不准應試地方官於定例一年後有實心任事拏獲多起者照獲盜例給予議敘地方官署內官親幕友家丁仍有吸食被獲者除本犯治罪外該本管官嚴加議處各省滿漢營兵每伍取結照地方保甲辦理其管

轄失察之人照地方官衙門辦理庶軍民一體上下肅清向之吸食鴉片者自當畏刑感格如是則漏卮可塞銀價不致再昂然後講求理財之方誠天下萬世臣民之福奏入上嘉之命大學士軍機大臣等議定章程下各將軍督撫等奉行十九年二月遷大理寺少卿五月升通政使司通政使六月充江南鄉試正考官九月擢禮部右侍郎十一月以刑部審辦臨榆縣民姚恩睿呈控協領德凌阿一案人證卷宗屢提未到命爵滋馳往山海關查辦途次遵旨查訊豐潤縣知縣許瀚被參濫刑勒派各款究出擅責武舉及生員違例充當鄉總不行禁革復倚法刑辱等情奏請將許瀚下部嚴議十二月抵山海關訊明姚恩睿案內犯供請仍歸部審辦俱允之尋調刑部右侍郎時御史杜彥士條陳福建海防各事宜命偕左都御史祁寯藻前往福建會同閩浙總督鄧廷楨查辦二十年三月偕祁寯藻覆奏閩省海防緊要請令總督每歲暫駐泉州督辦又以南臺福廠戰船修造草率遲延積壓議令迅速補修四月奏查禁海口鴉片煙販首在嚴辦漢姦責成地方文武水陸官兵盡力查拏並嚴密巡防永杜洋船竄至又控制海口請易礮臺爲礮墩將建立保護並安礮施放之法詳晰具陳又以漳州泉州府屬行使洋錢或

由外洋流入或係內地私鑄奏請令沿海地方官於商船進口時嚴查夾帶其私鑄者照私鑄洋銀例治罪並限一年赴官呈繳官爲給價所收洋錢送局鎔化又查奏晉江等縣械鬪斃命情形請嚴緝會首人犯拆毀私設銃樓並擬禁械鬪章程六條一選擇賢吏力圖整頓一查拏兇犯毋輕會營一遴舉鄉族各長以重責成一嚴拏鬪匪以絕根株一收繳火器以息兇燄一整飭倫紀以崇教化又奏查明漳泉盜匪議定責成緝捕章程均允行八月偕祁寯藻還抵浙江遵旨查奏台州温州各府屬栽種罌粟業經疊次剷除仍令各廳縣隨時履勘究辦台州府知府潘觀藻疲懦無能請勒令休致得旨褫職又以已革温州府知府劉煜試行票鹽不善被議定罪輒遣人赴京屢控九月遵旨訊明並無枉屈曉瀆謬妄奏請仍遵前旨遣戍新疆允之先是四月閩浙總督鄧廷楨等奏報英吉利船滋事由廣東犯福建各海口廈門官兵攻擊英船擒獲姦匪各情並保奏出力員弁至是命偕祁寯藻仍赴福建確查並歷次官兵防堵接仗及英船停泊各情形均遵旨查實奏聞十一月轉左侍郎二十一年正月奏籌辦海防急宜募兵節餉以操勝算略言承平日久水師廢弛兵額既缺非水勇鄉勇無以助攻守戰艦未修非商船

漁船無以資駕馭應令民間力行團練遇有英船入口卽送進兜剿如此則可省徵調之煩而所在皆精兵重鎮矣疏入下欽差大臣伊里布暨沿海將軍督撫等體察辦理旋回京二月至五月歷充各省舉人覆試庶吉士散館新進士朝考閱卷大臣十月命偕大理寺卿博迪蘇赴直隸楊村查驗剝船訊明湖南運員兆瑞拖欠剝船民人水腳銀兩奏請嚴議勒追並援案請由天津道庫借給剝船銀兩回籍俱如所請旋以陝西革員梁光泰列款訐控上司命偕刑部左侍郎柏蔭馳往查辦十二月途次山西遵旨訊明遊幕民人茹鴻逵控案實係挾忿刁控二十二年正月訊明梁光泰所訐虛誣均論如律五月丁父憂二十三年銀庫虧短案發爵滋曾任查庫御史坐失察奪職罰賠二十四年十月服闋十一月賠項完繳得旨以六部員外郎用咸豐三年卒子秩林揀發湖北知縣

袁希祖

袁希祖湖北漢陽人道光二十七年進士改翰林院庶吉士三十年散館授編修咸豐二年大考二等以侍講陞用三年正月補官九月轉侍讀四年八月充日講起居注官九月陞右春坊右庶子命繕寫貞觀政要進呈後賞大卷江紬大小荷

包旋請假還里五年三月銷假七月仍補原官十月復充日講起居注官六年六月疏言瓜州逆匪北竄陷揚州清淮危急其地毗連徐泗道路歧出若句通捻匪則堵截不易稍有疏虞畿輔重地豈可再致驚擾各路統兵大臣擁兵自衛以保舉爲苞苴之地借捐輸爲蠹蝕之謀而藉口於皇上之不發兵餉事事掣肘臣於告假回籍時目所親覩籲請簡派重臣統兵南下不但遏逆賊之妖氛且可燭若輩之智巧前此逆賊擾及河北皇上命僧格林沁督剿不及一年悉就殄滅可見命帥出師誠信爲體威望爲用苟能認真辦理未有爲其事而無其功者也疏入報聞九月陞翰林院侍講學士八年七月命協同批本九月超擢內閣學士兼禮部侍郎銜稽查右翼覺羅學十一月署禮部左侍郎九年正月署工部右侍郎兼管錢法堂事務二月充各省舉人覆試閱卷大臣三月署刑部右侍郎四月奏言咸豐三年因道路梗塞銅斤短少改鑄大錢當百當五久已不行當十之錢始猶值制錢三五近則竟以十當一銀價日增百物昂貴本月市價每兩至十七千窮民生計維艱又有所謂水上漂錢十文始能易一大錢而大錢又止值制錢一文老弱者無以爲生強壯者公然行劫乃至旗民兵餉每月三兩者止折錢十五千

出息微末餬口何資況大錢之鑄非惟病民亦且病國向日制錢重一錢二分大錢則定制止四錢八分以之當十原有五錢四分贏餘今民間折算至以十爲一是反以四錢八分銅作一錢二分用也大錢之鑄已六七年京外既不通行城中亦並不見多其故有三臣見東西單牌樓下收買大錢鎔而爲餅仍運往捐銅局出賣捐銅局亦明知其故特以賤價收買開銷之外儘有贏餘此大錢出路一也臣昨往京東出差沿途有新沙制錢明係大錢改鑄此大錢之去路二也京中銅價每斤值京錢二千二百今大錢二千二百文計重三斤四兩若鎔毀成銅頓得三倍之利此大錢之去路三也國家錢法例重一錢二分加以爐火工食耗費甚多是以絕無私鑄私銷之弊今天下皆用制錢獨京師一隅用大錢事不畫一故百弊叢生臣請悉復舊規銀價必減窮民易於得食庶不致流爲盜賊或謂百物雖貴尙幸銀價之昂較諸用制錢時猶爲便宜此在富貴之家或有此論小民終日勤苦獲錢不過數百市中米價至值錢四百有零一切工作之人何以餬口臣非故爲異論目擊時艱不敢不直陳之旋充殿試讀卷官朝考閱卷大臣五月充福建鄉試正考官十一月請假省墓十年正月回京閏三月充會試覆試閱卷大

臣庶吉士散館閱卷大臣五月充朝考閱卷大臣尋奏言臣去年出差道經蘇常距賊營止數百里而熱鬧繁華笙歌達旦直不知強寇在鄰昨閱邸鈔常州無錫以次被陷四月十二日大股直撲蘇州十二日蘇州卽已失守雖賊勢猖狂何至一日卽報失陷數年以來失事地方情形大率類此其所謂失守無所謂守也但聽其失一經奏聞不過革職暫留軍營以觀後效而已所謂收復不見其收自然而復俟賊自去卽虛報勝仗開列保薦爲樹植私人之計似此用兵安有成功之日臣愚以爲今雖潰敗決裂而天下大勢尙有可轉之機隱伏其中蘇常之地賊窺伺已久一旦得之子女玉帛賊志已爲鑿足不特金陵老賊全股奔注卽天長六合之賊亦欣羨無已皆將往而分肥不觀李若珠昨日之勝仗乎明明賊欲南渡是以該提督剿辦尙能得手臣愚以爲乘勢散緩之時皇上宜選派重臣擇清淮之地扼要駐紮統籌全局使事權有所統攝至於江南軍務皇上已命曾國藩卽赴兩江總督署任迅圖克復蘇常臣愚以爲蘇常之地不必力爭曾國藩卽繞出寧國馳抵江浙地界而前後受敵計非萬全萬一軍威再損其患何可勝言莫如令胡林翼由江北進攻牽制安慶諸賊令楊載福以礮船水師由大江直下彼

此接應令李若珠力擊天長六合之賊以出江浦遙爲聲援密授曾國藩機宜爲由寧國赴援之勢而潛引精兵倍道以取金陵金陵此時人心不固取之易於反掌若得金陵賊勢必日見窮蹙卽以殘破之江浙爲賊之逋逃藪由是而驅之下海無難矣今日之事勞師糜餉無盡無休加以事權不一各路統兵大臣散而無紀不相救援其賢者往往孤軍深入力盡援絕血戰陣亡其不肖者擁兵自衛此竄彼逃種種取巧皇上宜特簡重臣如僧格林沁者帶兵前往以資統禦積弊旣除精神乃奮此天下轉移之一大機也又奏臣屢探南來之信多云張國樑血戰受傷投水自盡目今並未具報該員爲天下人心所係屬其生時大營倚之爲長城其死後大帥視之如草芥將何以爲天下勸乎夫一死輕於鴻毛而生者尙得苟延殘喘人心至公每於此處視朝廷之舉動以爲向背應請明降諭旨迅速查明具奏如其死也自應優予卹典以安外間降將之心如其尙存別有情節亦應早定功罪以塞天下是非之口疏入上躔之旋署戶部右侍郎兼管錢法堂事務六月奏言前因浙江失守命在京大臣各舉團練大臣選派委員回籍督辦臣思團則一時可集練非經久不能旣云團練非五六千人不可每日必人給百錢乃

可餬口計一月之費已屬不資加以督辦大臣及隨員差役薪水所資鑼鍋帳房費將安出即使費有所出團練有成而此五六千人以之制敵則不足以之騷擾則有餘坐耗半年費無所出不潰何待且派往大員萬一與地方官意見不合必至互爲水火更足貽誤大局請降旨申諭使知團練乃自衛鄉閭之至計並不以此科斂擾民亦不必日給口糧坐守困耗儻大用大費正項錢糧旣不能動不得不取資於民輕則聚衆重則返戈大可慮也七月復奏言臣於戶部值日聞直隸總督恆福知照順天府准英領帶兵入城換約皇威震怒命傳檄殲滅羣醜臣以爲宜暫就和議遷延數日以便布置周妥通州以南有僧格林沁大兵可保無虞惟西南兩路可由保定直達京城急宜防堵臣又思天津水會人等或可密爲聯絡與僧林格沁兩路夾擊前派往張之萬焦佑瀛未知已辦有頭緒否臣請前往察看情形殲滅醜類八月又奏言僧格林沁旣擒獲吧嘎哩宜明正典刑以作士氣自古夷患多在邊陲今天津近在畿輔若容其設立馬頭異日將防不勝防前年廣東之役虜葉名琛囚柏貴狂悖已極若輕縱放還將何以對死事之臣且僧格林沁擒之皇上縱之萬一逆醜復張蒙古之兵安肯復爲用命自道光年間香

港爲英人占據其勢漸張臣聞兩廣總督林則徐曾將英領義律擒獲後經琦善者英牛鑑等專言撫夷甘心放還以致鎮江定海先後失守以中國二千一百萬之帑藏厚資敵利貽患至今竟以四五千衆橫擾通州天奪之魄吧領就擒宜正典刑以絕禍根或謂英領有四國之衆概予駢戮恐將來兵爭不息此不知外人之情者也臣上年回籍族中有在上海貿易者言英人強而不富以火輪船爲長技槍礮機關靈動確然難犯然通商一事用兵又一事各不相謀英人用兵之費全資商力加以內地漢奸告以中國苦兵乘機尋釁又虞己力不足句聯四國狼狽爲奸其敢於狂悖如此者皆外間封疆大吏因洋稅出息不少貪其利而縱容之以致養成今日其實中國百貨皆外洋所必需不但大黃茶葉有關洋人性命若真閉關不與通商則通商之洋人必與用兵之洋人尋鬪不已而我中國之洋稅自在也臣又聞廣東人言上年英人受創之後氣已不振今年糾衆來京衆皆不願脅之以威有抵死不肯來者是以募廣東之潮勇登州之士匪湊集三五千入下此孤注今逆首就擒立見解體矣臣又聞英人火輪船成本甚重大者值二百萬金小者值百萬金宜懸重賞募海口亡命之徒必有能以計毀之者此第一

要著若能使之片輪不返英人雖十年生聚十年教訓亦力有不給此一勞永逸之策也十月兼署兵部右侍郎稽察中書科事務十二月卒

呂賢基

呂賢基安徽旌德人道光十五年進士改翰林院庶吉士十六年散館授編修十七年充順天鄉試同考官二十一年充文淵閣校理二十二年正月轉湖廣道監察御史二月奏言南河正料購於他處不如取給於葦蕩每年葦蕩所產除工需外以其餘定價設廠賣與民間正料足可以防險工則水患息柴價多可以濟公用則經費省應請敕下江南河道總督悉心查辦又奏請申禁各省加派勒捐之弊俱允之七月轉掌山東道監察御史十月陞禮科給事中十一月奏參候選知州鄂雲夤緣投入揚威將軍奕經幕下誑騙欺濫支軍餉又廣東劣幕余廷槐盤踞多年贖貨受賄與肇慶府訓導黃培芳表裏爲奸藉團練鄉勇乾沒軍餉且招募匪徒充數請敕該督撫嚴查究辦如所請行二十三年八月轉禮科掌印給事中十二月丁父憂二十六年服闋補禮科給事中二十七年四月轉吏科掌印給事中七月以河南旱災籌辦賑卹疏請將江南捐輸運京米石改撥河南接濟

災民下部議行二十八年三月巡視東城九月俸滿截取記名以道員用十月以江蘇安徽湖北各省水災詔發帑金賑卹賢基奏陳荒政積弊並賑卹急務略言辦賑之弊莫如造冊稽延定例水旱成災督撫疏報卽先給饑民一月口糧再查被災輕重分別給賑誠以饑寒待哺若必待查取戶口完竣則老弱之流離轉徙已多應請敕下該督撫飭各屬遵照定例一面查取戶口一面先行放賑無論極貧次貧均俾先霑實惠俟冊籍已定務於限內具題加賑卽按照極貧次貧應給米石分別給與其加賑日期務與初賑接續毋許間斷戶口或有開除續增隨時具報儻有報勘後故意延緩者卽予嚴參庶有司不致貽誤而愷澤得以旁流其辦賑急務數條一多設粥廠並嚴革剋扣攙和積弊一兼籌放錢糶米之法一賑緩恩詔急行宣示一招商採買鄰省米穀接濟民食一收卹遺棄幼孩收買販賣牛隻疏入下所司議行十一月以捐備本籍賑需下部議敘二十九年稽察西倉三十年正月文宗顯皇帝御極賢基應詔奏陳四條一懋聖學請將大學章句大學衍義大學衍義補及朱子全書分日進呈一正人心請慎擇學校之官上自成均下逮各省府州縣學皆精其選一育人才請培養於平時激勵於臨事一卹民

隱請敕各督撫查劾地方官之累民者並將江蘇浙江等省捐米例停止疏入惟分日進書一條部議寢之餘俱如所請二月陞鴻臚寺卿咸豐元年正月超擢工部左侍郎六月充浙江鄉試正考官二年正月兼署刑部左侍郎三月奏粵匪河工度支漕運事事可危請詔求直言略曰粵西會匪滋事二年以來命將出師尙無成效甚至圍攻省城大肆猖獗南河豐工未能合龍重運之阻滯災民之屯聚在在堪虞河工費四五百萬軍需費一千餘萬部臣束手無措必致掎克腋削邦本愈搖竊謂今日事勢譬之於病元氣血脈枯竭已甚而外邪又熾若再諱疾忌醫愈難爲救惟有開通喉舌廣覓良方庶可補救於萬一應請特旨令大小臣工悉去忌諱一改泄泄沓沓之故習於時政闕失有可補救者各抒所見盡言無隱以期集思廣益疏入諭各部院大臣九卿科道有言事之責者於政治得失民生利病有可補救者各據見聞直言無隱八月充順天鄉試副考官九月署工部錢法堂事務充順天鄉試覆試閱卷大臣三年正月以粵匪由楚犯皖命賢基馳赴安徽會同巡撫蔣文慶前署廣西巡撫周天爵辦理防剿事宜時兩江總督陸建瀛退守江寧賢基奏稱江防宜扼重上游當塗之東梁山和州之西梁山相距僅

三里對峙如門南岸迤東三十里有采石磯最爲中流要隘應請敕下陸建瀛前赴東西梁山布置不可株守金陵至陸路賊匪逼近宿松若取道江北則由太湖桐城舒城合肥下巢湖以達江僅五百餘里查江北以廬州爲最要廬州以巢湖爲最要蓋廬州爲七省都會江皖水陸恃爲屏蔽魏吳南北朝均爭之以爲江淮門戶宜命重臣駐筭此地又地多匪棍毗連潁鳳可就近彈壓巢湖在廬州東五十餘里由東關達裕溪口出江計百二十里適當梁山上游若能招集匪徒使不爲賊困儻賊順流東下則駛出江口與梁山鎮合力攻擊必可獨當一面上嘉納之尋奏請敕部撥帑備用又奏所過地方如查有堪備教習團練之人請咨明各該督撫遣赴安徽軍營以資差委均如所請二月奏請敕給事中袁甲三廣東潮州府遺缺知府趙昀均赴安徽幫辦團練防剿事宜允之尋偕署安徽巡撫周天爵奏言團練防剿三事當分寄其任併致其力以圖之團練之事江北諸省大吏各就地方飭屬認真辦理激勸紳民殲除土匪防堵之事於江北沿江一帶擇精幹牧令稍假威權令其練本邑之兵團本鄉之勇因本地之糧以守本境之士各固藩籬永免徵調察其辦理之善者陞銜加俸不遷其職俾得盡心固守剿賊之

事專責之統兵大帥如大帥紮營去賊百餘里外立即逮問如此則各有責成難於推諉疏入上韙其議八月粵匪由英山縣犯太湖縣直抵石牌竄踞江家嘴並分股竄出洪家埠奪船意圖東下賢基檄已革按察使張熙宇率遊擊賡音泰等分路進剿敗之十月安慶之賊分股由清涼菴至十里鋪犯集賢關各路兵勇接戰失利賡音泰與遊擊伍登庸均死之賢基偕巡撫李嘉端奏請交部優卹允行尋賊由集賢關犯桐城縣距城十餘里賢基檄孝廉方正馬三俊等率練勇迎敵並遣文生張勳赴張熙宇行營請援張熙宇以未接警信回覆練勇遂不支同時潰散桐城失守張熙宇退守大關賢基偕署安徽巡撫布政使劉裕鈐奏聞得旨張熙宇著卽正法時賢基方駐舒城有告以無守土責又未轄一兵賊鋒銳甚可退守以圖再舉者賢基力斥之乃率練勇登陴守禦未幾城陷賢基死之十一月巡撫江忠源查明奏聞諭曰前因劉裕鈐奏安徽舒城失守侍郎呂賢基尙無下落朕深知該侍郎素懷忠義必能大節無虧茲據江忠源奏逆匪於十月二十九日攻陷舒城呂賢基殉難隨員幕友尙有數人同時盡節呂賢基由翰林科道洊陞京卿朕因其品學兼優超擢侍郎本年春間令其回籍督辦團練頗能實力任

事該侍郎年力正強方資倚畀乃以逆匪竄擾舒城捐軀盡節悼惜殊深呂賢基著追贈尙書銜照尙書例賜卹任內一切處分悉予開復應得卹典該衙門察例具奏伊子編修呂錦文著服闋後以侍讀陞用所有隨員幕友盡節姓名均著查明請卹又諭曰侍郎呂賢基素懷忠義大節無虧業經降旨追贈尙書銜優加賜卹著再加恩於舒城建立專祠以慰忠魂而光卹典並著賞銀三千兩交伊子呂錦文祇領卽日前赴安徽扶柩回籍治喪用示朕篤念盡臣有加無已至意尋賜祭葬予諡文節入祀京師及本籍府城昭忠祠賞騎都尉世職襲次完時以恩騎尉世襲罔替八年安徽巡撫福濟奏請入祀鄉賢祠上以賢基品行端方居官忠直名副其實允之子錦文翰林院侍讀維幹襲世職

戴熙

戴熙浙江錢塘人道光十二年進士改翰林院庶吉士十三年四月散館授編修七月大考二等陞右春坊右贊善十四年轉左春坊左贊善十五年三月充會試同考官五月丁母憂十七年服闋十八年閏四月補原官六月遷右春坊右中允命在南書房行走七月充日講起居注官提督廣東學政十一月陞翰林院侍講

十九年六月遷右春坊右庶子俱留學政任十月御史焦友麟奏陳廣敷教化整飭風俗熙偕兩廣總督鄧廷楨等遵議奏覆略言雍正七年乾隆元年議定各省州縣設立講約選舉約正每月朔望宣講聖諭廣訓地方官並教官仍不時巡行宣講加意化導成憲詳明歷久遵奉茲該御史請督令教官按期宣講聖諭廣訓直解自應申明定例責成實力奉行至所稱查有習教等事准教官會縣拏究其扶同隱匿者生員連坐查教官專資訓課若兼責以地方之事恐拏究未能得力而訓迪轉致分心且恐藉此干預地方亦不可不防其漸生員則讀書明理容有任事之才然恐稍涉迂謹者雖知秉正嫉邪而實未諳事務其向來好事者甚至捕風捉影或更涉於糾紛且繩以連坐之法更恐倒顛是非畏罪妄指其流弊不可勝言應請毋庸置議見當嚴察鴉片之際儻膠庠未盡肅清則草野曷由觀感是查禁生員吸食鴉片實先務之爲急亦因地而制宜應飭各教官於該管生員留心訪察如有沾染惡習卽據實舉報儻失於覺察甚或知而不舉一經發覺立予參處惟見行新例並無教官處分專條擬請敕部明定處分以示警惕至教官賢否不一儻其身自吸食何以能範諸生宜飭藩司慎選於平時州縣訪察於就

地有犯卽行嚴參如此層遞稽查示之標準庶師道立而善人多士習端而民風厚矣如所議行二十年三月陞翰林院侍講學士仍留學政任十月差竣奏請回籍省親二十一年回京二十二年三月以父老請開缺終養允之六月丁父憂二十四年服闋二十五年正月來京候補三月充會試同考官五月復提督廣東學政六月補原官十二月充光祿寺卿二十六年二月陞內閣學士兼禮部侍郎銜俱留學政任十二月差竣回京二十七年四月以學政任內失察年老武生入場革職留任五月稽察中書科事務二十八年擢兵部右侍郎自終養起復並兩資差旋至擢侍郎均得旨仍直南書房二十九年閏四月罷南書房行走七月以本籍水災捐資備賑下部議敘旋因病陳請開缺詔以三品頂帶休致三十年文宗顯皇帝御極禮部尙書孫瑞珍遵旨保舉人才以熙奏入召來京聽候簡用熙以病不果至咸豐三年粵匪歷竄湖廣安徽等省攻踞江蘇江寧府復四出紛擾浙江戒嚴熙偕官紳勸諭捐輸舉行團練五年浙江巡撫何桂清以熙勸辦出力奏聞下部優敘七年巡撫晏端書以熙設局省城募勇操防協助官軍奏聞九年以督辦團練有功賞二品頂帶十年二月賊犯杭州熙偕杭州將軍瑞昌等激勵兵

民嬰城固守城陷熙死之五月瑞昌疏聞諭曰前任兵部右侍郎戴熙在浙江本籍辦理團練及協防局務殫精竭力任勞任怨本年賊擾省城與該將軍力籌堵剿勤勞晝夜公爾忘私嗣於城陷後從容盡節悼惜殊深著追贈尙書銜照尙書例賜卹任內一切處分悉予開復應得卹典該衙門察例具奏並於錢塘縣本籍建立專祠伊弟副貢生戴煦媳金氏甥候選訓導王朝榮同時殉難均著交部分別旌卹並准其一體附祀伊子候選訓導戴有恆著賞給通判俟服闋後分發省分補用以示朕篤念忠盡至意尋賜卹如例予諡文節賞騎都尉兼一雲騎尉世職襲次完時以恩騎尉世襲罔替子有恆江蘇候補通判